


# 粵太記


自序三  
五七五




			九	漢
		一〇	〇	書
		一三	七	門
		三三	六	
		函	號	類
		冊		

庫文閣內		
九	九	漢
函	〇	書
一	七	
三	六	類
架	冊	

內閣文庫	
番號	漢 9076
冊數	10 ( 9 )
函號	202 83





粵大記卷之

獻敬

文學經綸

漢陳元楊孚董正郭蒼


晉王範黃恭

唐劉軻區冊常昌明周傑

宋胡賓王林巽譚旻歐陽經

盧侗石汝礪霍晞石處道

嶺南郭棐篤周甫編



皇朝大紀

卷三十三

歐陽欝 譚凱 潘預 鄭玠

黎獻 區適子 阮泳 蔡微

李閔 羅蒙正 張鵠

明其友信 馬名廣 黃勳 梁宏

唐豫王 惠吳 敬黃裳

陳迪 立敦 廖謹 鍾瑛

鄭羨 李亨 劉玘 黎暹

葉孟昭 林茂森 李孜 馮載

方用中 梁芬 高 王文友 馮載 馮載

陳其魯 陳彥際 葉春芳 侯天錫

陳元字長孫封川人父欽字子佚習左氏春秋王莽從欽受左氏學以欽為馱難將軍元少傳父業為之訓詁銳精覃思至不與鄉里通以父任為郎建武初元與桓譚杜林鄭興俱為學者所宗時議欲立左氏傳博士范升奏以為左氏淺末不宜立元聞之乃詣闕上疏曰陛下撥亂反正文武並用深愍經執謬雜真偽錯亂每臨朝日輒延群臣講論聖道知丘明至賢親授孔子而公羊穀梁傳聞於後世故詔立左氏

博詢可否示不專已盡之群下也今論者沈溺所習  
翫守舊聞固執虛言傳受之辭以非親見實事之道  
左氏孤學少與遂爲異家之所覆冒夫至音不合衆  
聽故伯牙絕絃至寶不同衆好故卞和泣血仲尼聖  
德而不容於世况於竹帛餘文其爲雷同者所排固  
其宜也非陛下至明孰能察之臣元竊見博士范升  
等所議奏左氏春秋不可立及太史公違戾比四十  
五事案升等所言前後相違皆斷截小文媒黷微辭  
以年數小差掇爲巨謬遺脫纖微指爲大戾抉瑕摘

釁掩其弘羨所謂小辯破言小言破道者也升等又  
曰先帝不以左氏爲經故不置博士後主所宜因襲  
臣愚以爲若先帝所行而後主必行者則盤庚不當  
遷于殷周公不當營洛邑陛下不當都山東也往者  
孝武皇帝好公羊衛太子好穀梁有詔詔太子受公  
羊不得受穀梁孝宣皇帝在民間時聞衛太子好穀  
梁於是獨學之及即位爲石渠論而穀梁氏興至今  
與公羊並存此先帝各有所立不必其相因也孔子  
曰純儉吾從衆至拜下則違之夫明者獨見不惑於

朱紫聽者獨聞不謬於清濁故離朱不為巧眩移目  
師曠不為新聲易耳方今干戈少弭戎事畧戢留思  
聖執眷顧儒雅採孔子下拜之義卒淵聖獨見之旨  
分明黑白建立左氏解釋先聖之積結泐汰學者之  
累惑使基業垂於萬世後進無復狐疑則天下幸甚  
書奏下其議范升復與元相辯難凡十餘上帝卒立  
左氏學太常選博士四人元為第一元以才高著名  
辟司空李通府大司農江馮上言宜令司隸校尉督  
察三公事下三府元上疏曰臣聞師臣者帝賓臣者

霸故武王以太公為師齊桓以夷吾為仲父孔子曰  
百官總已聽於冢宰近則高帝優相國之禮太宗假  
宰輔之權及亡新王莽遭漢中衰專操國柄以偷天  
下泥已自喻不信群臣奪公輔之任損宰相之威以  
刺舉為明徵訐為直至乃陪僕告其君長子弟變其  
父兄網密法峻大臣無所措手足然不能禁董忠之  
謀身為世戮故人君患在自驕不患驕臣失在自任  
不在任人是以文王有日昃之勞周公執吐握之恭  
不聞其崇刺舉務篤察也方今四方尚擾天下未一

百姓觀聽咸張耳目陛下宜脩文武之聖典襲祖宗之遺德勞心下士屈節待賢誠不宜使有司察公輔之名帝從之宣下其議李通罷元復辟司徒歐陽歛府以郎為掾數陳當世務并正郊廟之禮帝不能用以病卒於家子堅卿有文章能世其業云

楊孚字孝元南海人章帝朝舉賢良對策上第拜議郎和帝即位歆用兵匈奴孚奏言創造用武守業尚文故周勝殷則有載戢干戈之頌太宗息兵嘗言自勝衣冠念不及兵先帝繼述虜來則應未嘗先伐故

孝章之謚追配孝文詩曰允文文王克開厥後又曰倬彼雲漢為章于天二帝之謂也願陛下繩美祖宗毋輕用武永元十二年荒旱令在廷議政令得失孚曰漢制郡國之士誦肄孝經察其志行選舉孝廉故帝謚必稱孝者躬行化率也王莽不服母喪天下誅之然今時公卿大夫罹父母憂不得去位而黎萌孝悌力田反得爵級非所以為民表儀也且郡邑侵漁不知紀極貨賂通于上下治道衰矣宜詔中外臣民均行三年通喪而吏治必務蕪平以勸選舉之士庶

幾克誠小民副承天意帝從其議詔禁有司假勢行  
邪其有巧法析律飾文增辭貨於言罪成乎手事  
發重罪之賜三老孝悌力田爵三級為父後者爵二  
級窮民不能自存者予粟時南海屬交趾部刺史夏  
則巡行所部冬則還天府表奏舉刺不法其後競專  
珍獻乎乃枚舉物性靈悟指為異品或為韻語使士  
民識之遂著南裔異物志自後羅浮璫瑁之屬日絕  
世謂能通神明乎家在江潯北岸嘗移洛陽松栢種  
殖宅前隆冬蜚雪盈樹人因目其所居為河南峯後  
為臨海太守復著臨海水土記亦以正獻貢也世服  
乎高識不徒博雅云

董正字伯和番禺人少有令姿耽意術籍年十五通  
毛詩三禮春秋遂以學行知名公府以其有用世才  
常詣其廬疇咨理道數被辟命皆不就熹平末張角  
袁術起難天下大亂正每仰觀天象知漢曆之不長  
輒掩涕太息或勸使出仕嘆曰潛龍以不見為德君  
子以藏寶自完吾惟俟時何迺相迫邪賦性高潔貧  
寒不戚志在規俗躬耕以足衣食暇即講詩書陳禮

灋遠近多從之游鄉閭或少為不善必相戒曰吾伯  
和得無入於耳否有不平者多詣正直之隱士南陽  
車遂聞正冷名不遠千里徑來投正正與同志恩如  
兄弟數年中遂得病正為傾家救卹病篤正呼遂字  
曰德陽君更有以見屬否遂瞪視曰以死累君言訖  
而絕正為停柩於堂殯殮之禮一視兄弟之喪躬送  
喪於南陽而返粵產素多奇瑰之貨番禺為都會商  
賈湊集貿遷易以致富加以夷僚叢雜習尚輕悍鬪  
爭射利未嘗知學感正清白偷俗自爾日變建安中

正卒葬番禺之東衆為刻碑表曰有漢徵士董君之  
墓過者必式晉隆和南海太守袁宏追想其風采  
乃訪求世族條列行誼聞于朝有詔旌表門閭史論  
曰董正養真衡宇泥視軒冕嘉遯之貞百世所師嗚  
呼遐裔而有斯人殆豪傑特起者哉

郭蒼字伯起曲江人富有文學舉茂才為荊州從事  
熹平三年太守周憬開導昌樂六瀧流通商旅郡民  
頌之蒼為撰神漢桂陽守功勳銘曲紅長區祉勒石  
于瀧上至今頌周守之功則蒼碑文之力也因是知



文之不可以已也

王範南海人好讀書有鑒識州閭推重之吳孫皓時閉戶不出門問其繇對曰見彈繳而弗避非靈禽也處亂世而求聞達非知士也人以為名言郭馬亂廣州逐刺史徐旗範從旗避難朝夕不離側者五年既歸以琴書自娛未嘗妄交有司賢其行薦辟之皆辭晉平吳後遵行九品官人之法每州置大小中正俱以本土人為之刺史熊睦薦州人德充才盛無踰範者舉秀才乃以範為廣州大中正選舉人才第其高

下皆慚輿論時秘書丞河內司馬彪號博學嘗著九州春秋盛行于時範閱之見其畧於嶺服紀錄弗稱乃蒐羅百粵典故為書名曰交廣二州春秋泰康八年表上之訂述該覈衆見之稱服自是名動京師範為人卓犖不群未嘗事流俗事篤學至老不廢交廣素缺脩載自範始創為之史論曰王範交廣春秋事贍詞工昔稱之而今不傳嗚呼識時之通事上之忠秉心之公亦足以芳耀於無窮矣

黃恭字義仲南海人少性恬漠履尚清潔刺史鄧岱

觀面察言即器重之錄為記室叅軍草檄聲罪山越  
讐服比轉封山令居夷剖事甚有治材然非其好也  
州察孝廉舉為佐著作郎父憂去職比服闋不起教  
授生徒發明聖籍鄉里推重徵辟不就乃補廣州大  
中正於是蒐緝王氏交廣春秋補其遺漏以君親倫  
理為重其論合浦之士有尹牙者為郡主簿受知太  
守問其愁悴荅以重讐未報即變姓易名為執之天  
子竒其才因赦不問此事邦君之大義也評者比諸  
刺客則謬矣丁茂孝感人謂之虛然則通于神明者  
非邪朱庄令女與母爭死不辱反為鄙論所非皆違  
正道不應輕議其他研覈行此類也後復廣為十三  
州記首釋郡縣弘指世傳其書族子整為平越司馬  
博洽工文詞有集十卷今不傳

劉軻字希仁曲江人其先家本沛上天寶之亂祖効  
携家自淮入湘至韶家焉軻生大曆中父綺方商於  
郴感異夢亟買舟歸見其風骨竒秀大異之曰興我  
家者此兒也吾夢孟子顧臨因以軻名之成童嗜學  
博洽靡所不通從學月華寺僧慧朗禪師遂窮內典

貞元初扶風馬植見其文嘆曰韓愈之流也自是入  
廣求師聞壽春楊生寓羅浮講授春秋軻杖策從之  
遊者數年乃馳書於植曰楊生以傳書為道者也二  
代聖王既歿其道盡留於春秋春秋之道軻以不下  
牀而求之其在生矣每一講問疑周公孔子左丘公  
穀迴環在坐假生之口以達其心也元和初乃下羅  
浮隱於匡廬山耕田自食其力夜忽夢一書生自言  
其祖歿於此僧瘞之牖下不能自安乞為遷塋軻訪  
得其實具視窆之及還虎溪亭書主來謝持二

俾食之軻嚼一吞二自後文學倍優韓愈南遷過韶  
聞軻之言欲記其事後以事不果軻所為文精邃追  
逐古人閉戶著書有三傳指要十五卷漢書古史十  
卷黃中通理三卷翼孟三卷隋鑑一卷三禪五革一  
卷三傳指要則著於羅浮者後以韶籍登進士第歷  
官史館嘗以春秋條貫取歷代刪冗補闕成一家言  
馬植薦之至侍御史世稱其文章與韓柳齊名  
區冊南海人系出區冶子之後著於長沙以南為名  
族冊為人喜讀書循理謹持雅飭惟恐戾于典則人

樂從之遊家徒四壁立縹緗盈其門挾卷呻吟無少  
倦時下筆為辭章千百言滾滾不休自郡守以下皆  
重其文采貞元十九年監察御史韓愈以言宮市極  
論天下根本為幸臣所讒貶陽山令愈大儒也以道  
自任世方之孟軻冊以道喪學絕無所依歸遂冒險  
往陽山師愈愈亟加稱許及冊歸省其親為文送之  
其見重於愈者如此二十一年愈徵為江陵法曹累  
官吏部侍郎文章為一代鉅工冊因是知名時又有  
區弘者亦遊愈門愈有送弘南歸詩張籍亦有詩送  
弘蓋與愈周旋頗久愈遷法曹時弘送至荆門及愈  
入為博士弘亦隨之冊陽洪興祖謂弘即冊然其始  
末不類或其族人也夫樂正子獲教於孟子而其學  
進侯芭見知於揚子而其名傳昌黎韓子之賢上接  
孟揚之統而區冊能從之遊其行粹然一出于正亦  
可謂賢矣其樂正子侯芭之流與

常昌明循州龍川人家素饒富昌明勵志讀書工於  
詩律詞賦長慶中進士及第嘗上書宰相李吉甫責  
以協恭祀裏之義併獻所作昂實賦吉甫稱重之累

官校書郎轉秘書丞秘書清華之職自吳郡張率之後東南胄緒未有任者昌明耽閱麟籍慣乘鹿車雖荀勗之注寫竹書薛夏之移坐蘭閣莫能過也竟以勞瘁卒于官

周傑南海人開成中進士解褐獲嘉尉歷弘文館校書郎中和初禧宗在蜀傑上書言治亂萬餘言擢水部員外郎三遷司農少卿傑精於曆筭嘗以大衍曆數有差因敷衍其法著極衍二十四篇以究天下之數時天下方亂傑以天文占之惟嶺南可以避地乃

遣其弟鼎求為封州錄事參軍傑天復中亦棄官携家南適嶺表劉隱素聞其名每令占候天文災變傑自以年老嘗策名中朝耻以星歷事僭偽乃謝病不出龔襲位強起之令知司天監事因問國祚脩短傑以易筮之得此之復曰卦有二土土數生五成於十二五相比以歲言之當五百五十龔大喜賞賚甚厚龔以梁貞明三年僭號至開寶四年國滅止五十五年蓋傑舉成數以避害爾大有中遷太常少卿卒年九十餘傑生茂元亦世其學事龔至司天少監歸宋

授監丞而卒

胡賓王字時賢曲江人少力學以溥洽知名南漢時進士甲科嘗讀書中宿峽經史皆有發揮累官中書舍人知制誥劉鋹淫虐辭官歸乃著南漢國史自劉謙至鋹爲五主傳楊洞潛至陸光圖等三十三人爲純臣傳復有具臣亂臣宦官女謁之目凡十二卷鋹亡上其書于宋號劉氏興亡錄以明經授著作郎會詔有官者得與科試遂登咸平庚子進士第累遷翰林學士後致仕卒于家賓王爲人樂易俊爽言行不

苟居官憂國奉公歸鄉憐貧恤寡其所居鄉乾道中分隸乳源號學士里二邑人至今重之

林巽字巽之海陽人天聖中應才識兼茂明於體用科對策鯁切忤權貴主司不敢取慶曆中投匭論事仁宗異之授徐州儀曹不就南歸讀易著書八篇曰卦元卦經卦緯叢辭起律吹管範餘叙和總名曰易範人稱爲章範先生外有文集若干卷

譚侁始興人唐循州司馬誨之後皇祐壬辰進士博通經史教三子皆成名粹朝議大夫銜朝請大夫拊

中散大夫一門三大夫時人榮之粹名望尤著於張  
文獻公九齡為外家十世孫每歲躬詣公墓必致祭  
焉熙寧初知惠州有善政暇日嘗輯羅浮志序之以  
傳其餘詩文皆可觀人稱其學行子煥字文煥篤志  
好學嘗預薦書當父任力辭遜于弟大觀元年詔天  
下舉八行每路以三人為率廣東一十五郡無有應  
者郡以煥聞朝廷嘉其讓推舉八行之首次則歐陽  
珣許牧共三人為一路殊選煥仍登大觀三年進士  
甲科官至朝散大夫

歐陽經連州人家世業儒至經尤卓穎徐鐸榜進士  
登第後乞歸建致一堂日劬書其中初任杭州幕官  
以詩文見稱時蘇軾帥杭州表薦之云材猷夙壯忠  
孝兼全學古入官敏於從政官至朝散大夫知封州  
廬侗字元伯海陽人行實朴茂事親至孝為梓里推  
重其旨暇手不釋卷嘗結廬讀書西湖山博經史而  
易學尤粹自為訓釋日與諸生相討論五應鄉薦皇  
祐五年以恩釋褐守本州長史嘉祐中余靖蔡襄王  
舉元皆薦侗文行調惠州歸善簿未幾靖帥廣州以

機宜辟治平初諸司刻章交薦蔡抗以廣漕召還國  
子監亦復以經學薦之召對授國子監直講熙寧初  
力言新法不便遂求外補知柳循二州以太子中舍  
致仕立祭田及大潭塘以祀先人卒于家

石汝礪英德人號碧落子少穎敏讀書過目成誦自  
以生長嶺嶠局於聞見乃踰嶺而之江西從聞人遊  
久而有得五經多有講說於易尤契微妙常曰易經  
不須註但熟讀則見互相發明總一乾元亨利貞之  
道晚年進所著易解易圖于朝為荆公所抑蘇軾謫

惠州遇之聖壽寺與之談易及談羅浮之勝至日暮  
方散汝礪有水車記刻南山石壁明於樂律以琴為  
準所著有碧落子琴斷一卷行于世鄭樵最稱之

霍暉字明甫南海人篤志向學故與馬子才遊子才  
者鎮南節度推官鄱陽馬存也暉之為文也淵雋奇  
古不與俗合或勸易其習乃質諸存存以序送之其  
言曰南海霍公好古文日夜習誦其下筆極有力語  
梗而氣勁讀之有不能成句者以是連不得志於有  
司回進之士時或疑恠頗自悔歆為新麗軟熟之習



以易業為謀於予予曰子必勉之三代之文章民之  
所知也後之學者有所不知也是世之學者不如三  
代之民也非子之耻學者之耻也子必勉之初皇祐  
間新會龍山之水色變而為紫者旬日人皆以為瑞  
暘獨持論以謂清者水之真體也變而為紫非正色  
也其必水之怪乎水陰物也陰之類為小人為夷狄  
為盜賊姦宄今水失其常性吾恐其關於國家者大  
也因記其事其特立獨見此類也後蔡京童貫輩當  
國有金人之變江南盜賊蠱起皆如言元哲初入大

學時詔舉八行人以暘之脩已教於家者無間言遂  
以應命官終海豐縣尉時東莞王知亦有學行同預  
是科廣之士以八行著者暘暨知二人而已鄉評咸  
謂無媿色云知未及仕而卒

石處道字元叟德慶人自幼聰敏築室篤志讀書鄉  
人因其所居之村山水皆名書堂登元豐五年進士  
知松江縣以清白稱政暇發為詩詞有松江集官至  
朝奉郎祀于鄉賢祠

歐陽獻可字晉叔連州人幼領鄉薦俄厭科舉程度

之文即棄去乃學為古文嘗作所居見山臺記張魏公稱誦不已為名其讀書處曰致一堂作記而親書之

譚凱南海人性恬靜不妄言讀書務自得不為紛華所動年二十餘即不赴科舉崔與之與交稱其賢帥淮東日馳書薦于廣州守帥楊長孺孺得書喜曰敬老尊賢以風勵世俗吾心也亟往見之以為學老日南至長孺詣學謁先師畢守帥以下聚拜明倫堂長孺忽退立西偏命兩吏掖凱以進拜之既而貳車以下帥郡官旅拜其為時所重如此壽八十六卒

潘預字晉卿博羅人也篤學該洽以古文為鄉黨推重而尤邃於易三山林東負時名少許可及抵羅浮見預論易遂為之屈乾道中以特科授宜州司法叅軍時龔茂良帥廣聘至番禺訓迪諸生南州經學自是日盛

鄭玠字太玉涇陽人少博學通經史工於詩文入太學嘉熙初以上舍對策極言天下事正言李昉英亟稱之淳祐甲辰釋褐知博羅縣事賦詩志喜遂結廬

幽居洞後每政暇輒至讀書其中自稱幽居野人云  
時有異人逍遙子者常住茶庵相與唱和為神明之  
交玠治邑清靜不苟政成人和有曹叅之風部使者  
考最薦之擢大府寺丞以去逍遙子亦不知所適咸  
淳中玠子康佐知惠州乃闢庵為鄭公書堂吟詠泉  
石墨跡猶存

黎獻字子文東莞人性警敏異常而富學問甫弱冠  
授徒一依紫陽白鹿規以為教遠方之士聞風而來  
者戶外之屨恒滿講授暇取經史子集與埤雅小說

釋老之言摘其的對奇語編為事類蒙求對偶切要  
叙事精詳見者稱賞別號拙翁人稱拙翁先生

區適子字正叔登洲人父璵仕宋為德慶叅軍廉介  
有聲適子幼俊爽能文辭經史皆通大旨及長重厚  
寡言笑以博學洽聞稱學者多從之遊所居鄉名鮑  
洲而適子自號登洲鄉人因以其號名其鄉曰登洲  
云適子抱道不仕或問之曰吾南人操南音安能與  
達魯花赤俯仰耶元法南人不得長治郡縣皆蒙古  
色目人制之謂之達魯花赤故云劉與子序適子文

曰君德人也予以文士目之淺矣扶胥之南粵臺之下寧復有斯人哉故老傳今三字經適子所撰也童蒙多誦之子魯卿元末出粟四百石作粥以食饑者後饑民相率爲盜戒毋犯魯卿墓曰此作粥主人也廣州志遂以作粥爲適子誤

阮涑香山人至元初領鄉薦爲邑學教諭遷惠州路學教授學博行脩一時視爲儀表攻古文辭以韓歐爲宗子士桂亦以文行名其後有趙梅南楊士元者皆以詩翰鳴于時由涑倡之

蔡微字希玄號止庵宋學士襄之裔居萬寧後遷瓊山通經史善文辭知縣李思迪稱其文謂海南儒者未能或之先任樂會學校官後攝瓊郡學事值時不偶遂隱德弗耀纂瓊海方輿志以傳

李閔字子羽海陽人早喪父事母至孝性敏好學通春秋諸子史皆識其大畧至正間元兵逼城閔乘夜負母避難歸外族後姓曾氏隱居不仕教授郡邑子弟間有貧者輒與之書籍鄉人有爭者寧聞於官府耻聞於閔時號爲北源先生

羅蒙正字希呂其先廬陵人父稽叔游學新會遂家焉蒙正資稟秀拔勤學強記諸史百家無不成誦甫弱冠聞肇慶羅斗明工詩往拜之斗明嘉其誠又同族譜悉以詩法授之一載而歸大有詩名縣尹沈壽創古岡書院禮蒙正於師席一時學者聞風雲集未幾領湖廣省檄為高州文學秩滿歸仍授徒于書院至正丁亥赴省試遇開武功銓人或勸其借註巡檢不屑就以詩答之云儒冠不是將軍具只作當年措大看既不快心志落落遭元季亂避地郡城館於馬

吏趙式家式薦于司授南恩州教授時州判吳元良亦文士也素慕蒙正名一見歡如平生元良有志併合群醜據有一方欲用蒙正為幕賓以贊厥謀蒙正識其志力辭不就後因病以詩謝云願賜一廛閑養病簡編燈火伴青衿未幾卒元良禮葬之有詩集數卷傳于鄉

張搗字彥謙新會人蒙正門弟子也幼嗜學性敏強記年十八賦崖門懷古詩蒙正器之惜其相從之晚也洪武初以足疾不能行益留心經籍知縣謝景暘

為構書堂于象山之麓俾邑人往從受業扁其軒曰  
養拙晚年自號病叟人咸以象山先生稱之其學以  
明理為要詩文以典雅為本不事巧琢其弟子不拘  
學之淺深皆能識其大要不問可知其為先生徒也  
其友信名節保昌人家貧力學登洪武乙丑進士後  
坐累謫戍楚雄用薦起為瑞州訓導深明易理訓學  
者從事根本不尚浮華後學宗之嘗考廣西等處鄉  
試在瑞一十八年瑞人德之祠于學

馬名廣者禺人少讀經書能賦詩以家累充遼東開

元衛軍士洪武二十六年正月乙未名廣上言五事  
一曰遼東二十一衛定遼等大衛已有都司儒學金  
復海蓋四州已有州學其開潘陽廣寧義州亦皆名  
郡學基尚存遺碑猶在宜建學立師以復其舊二曰  
天下學校教育人材或出於工商技藝之家稍通膚  
淺即欺人傲物管子曰工商雜類不預仕伍萬一任  
之以政必無益於治宜慎選端厚明敏者入學每三  
年一考九年通考能通四書本經理者取入國學既  
入國學勿令歷事以荒其業三曰狹鄉之民宜選於

寬鄉地有餘而民力不給則分兵以屯之如此則民無游食之憂兵無坐食之害四曰兵老而營無丁者除其籍庶免有司勾補之勞五曰今華夏晏安夷狄遠遁正歸馬牧牛之日昔唐太宗初年置兵分隸禁衛天下八百而在關中者五百舉天下之兵不敵關中此居重馭輕之法也臣願外衛軍士老死者免補且漸收蕃衛移置京畿不勝社稷之福書奏上觀所言有可采者但工商技藝之子不預士伍則與孔子有教無類之意悖矣命禮部擇其可者行之名廣在衛讀書不輟至是詣闕上書上既納其言復命吏部用之遂授吉安泰和縣丞

黃勳字敏功東莞人博極群書為文奔騰雄放出入經史有古作者意元季避地白濠雖在擾攘中持志益堅無書披閱則假事文類聚與兄默手自抄錄風寒暑雨不倦其勵志如此洪武中以薦授邑庠訓導後改梧州二庠士子後多顯融者世稱其善教致仕卒于家學者因其別號稱之曰學圃先生

梁宏字廓之南海人少穎敏被選為弟子員貢入胄

監以學行知名司業劉崧試其文稱為奇才堂友長亦皆推重將省親蒙由道輦求方孝孺為南士之說以送行歸廣州後聞長安兵變遂不復仕

唐豫字用之南海平步人父奎字景文洪武初鄉貢授增城縣學教諭博洽群書鄉人號為唐書櫃湛萊民作亂往諭以義不從被執罵賊而死豫生而穎悟少從翰林典籍孫蕢遊作詩文有古人風度性剛介無諂曲交友克盡義尤篤於孝作蓼莪亭以寓孝思主事劉履以古孝子不能過稱之隱居授徒自號樂

澹與周祖生周祖念劉子羽何淮劉子高友號平步六逸皆德行尊嚴衣冠儼肅為世所欽嘗相與定鄉約十條一言秋收後即輸稅糧使役人無愆期二言補尺籍必遣少壯當行之人三言冠禮當依文公定制殊見習俗之美四言漸老燕非禮但如儀醮之五言父在子立違者叱之六言喪無款客遠者具蔬食朔望含哭勿留七言祭以四時忌日哭盡哀不飲酒食肉居宿於外如禮八言冠昏喪祭朋友親戚往來助之九言子弟教以孝友睦於親族鄉黨讀書學文



母令侈其衣冠博奕飲酒為父母儻十言鄉為甲其  
出入務相周知其事有不善者聞于有司治之庶免  
其累鄉人信而行之

王惠字仲迪瓊山人家本合肥從元千戶志調官海  
南遂占籍焉博洽能文學士解縉稱惠從趙考古講  
明性命義理之學潔白清脩毅然自立洪武未用大  
臣薦至京以三喪未舉力辭歸隱自號霜筠天下聞  
其節行所著有截山詠史嶺南聲詩鼓吹等集

吳敬字汝遜定安人尚禮好學專以讀書教子為  
士大夫咸敬重之嘗與王惠友善欲結鄉約以善瓊  
俗未果而卒子姓受遺教者掇科登仕不絕邑之文  
風自此漸盛

黃裳字迪吉番禺人少從李謙游明經學善文詞洪  
武癸酉鄉貢進士卒業太學未樂初授福建政和知  
縣適病荒歉勸富民發私粟以借饑民而官置簿書  
條其人名以印鈐之授諸富民約至秋成令息石以  
二斗而歸之且禁粟毋得出境獲全者衆民甚德之  
而他縣多孳餓云政為一省之最罹毋憂去服闋部

使者以文學政事薦陞禮部主事辛卯晉郎中壬辰  
以小誤左遷負外郎後歷刑部郎中卒裳有學識多  
所著述在政和時嘗與典史郭斯屋脩縣志其論社  
所以主石之義曰社祭土主陰氣也夫陽氣積而成  
天故其精為星陰氣積而成地故其精為石石擊則  
星出陰動生陽也星隕則化石陽變為陰也土為陰  
氣之積而石乃其精故社以石為主也時稱善論其  
他詩文亦多可採者時承南園詩社之後廣人多工  
詩嘗與周斷事溥敬曾知縣惟忠儒士潘翥胡悌梁  
案黎本寧楊肇所皆有名工時繼之者則趙不易何  
濬輩也東莞時有鳳岡詩社則陳靖吉何潛淵羅泰  
為之宗皆志欲追唐而力不逮其流甚靡後江門詩  
法既傳始翕然從之為白沙詩教云

陳迪字保中四會人博學能文篤於孝友洪武甲子  
領鄉薦明年登進士第任陵江縣丞有政聲坐事謫  
戍遼左以明經薦為國子助教仁宗在東宮時召  
試令入文淵閣同脩永樂大典居館職十餘年有詩  
文類集藏于家

丘敦字一成濬之子也性簡默塾師疑其痴濬留敦在家  
敦乃盡讀所儲書非有事足迹不涉公府對人塊如  
土木不出一語會高雷間有故河遺迹有司開通以  
便往瓊舟楫敦家書併及謂疏治失宜恐先貽害元  
人治河因之召亂往事可鑒濬得書始知其不凡也  
屢書趣還京邸以廕錄為太學生挾春秋藝試京闈  
下第遂屏去舉業研究經史百家自是絕無進取之  
意其學以積思自悟為主終日凝然無言繼以通夕  
不寐有所得發而為文多不起草落筆如飛酷嗜素  
問著醫吏運氣表三因說言皆有補於世時見李廣  
輩將復成化故事又作發冢論以攻宦者蓋取莊子  
詩禮發冢之義設為甲乙辯詰之辭謂其友蔣冕曰  
走為此論乃癡人說夢中事也夢者固癡矣安知聞  
人說夢者亦不癡其人哉夫天下之事心有所蔽則  
以惡為美以非為是以害為利者多矣古人不云乎  
箕糠眯目則天地四方易位自是其是者蔽於所見  
但見其是而不知其非人一切有言舉不能入自非  
為之說者逆探其所料指摘其所信推極其所期竭

兩端而盡之凡彼所以為之地者一一皆豫為之言  
 若彼之自言為者又曷足以感悟其心也邪予為此  
 論意蓋出此卒時晁哭之慟為之序其書以傳  
 廖謹字慎初以字行南海之葛岸人恬靜力學凡經  
 史百家之書靡不淹貫不妄交游以澹交名其齋求  
 樂中學士解縉出為交趾叅議嘗遇謹與之上下其  
 論題西樵讀書處有曰反身循理懲忿窒欲敬之敬  
 之如金如玉稷契臯陶何書可讀蓋深腴之識與不  
 識皆謂廖五經云以明經舉為四會訓導後轉桂林

南安二郡性樸實不能諛上官作古必解以自嘲又  
 之陞通山縣學教諭滿考尋轉南安教授致仕卒其  
 教人以執禮為先群從兄弟嘗受學者終身莫敢與  
 鴈行立兄子恂從謹宦遊入通山邑學中湖廣鄉試  
 宣德癸丑登進士至通顯事謹猶執服役人以是高  
 之有集陳璉序之以傳于世

鍾瑛字汝器高要人脩眉豐頰沉默莊重事親孝年  
 十一遊郡庠子史百家靡不該洽永樂辛卯登進士  
 待 文皇帝有事四方選學行之優者入秘閣習四

夷文字瑛與選為翰林庶吉士無何授編脩効勞編  
摩為詞林推重賜馳驛歸省鄉人榮之秩滿轉大理  
寺正仍辦秘閣事雖久居侍從不殊常布丁內艱歸  
哀毀成疾而卒朝論惜之

鄭義字伯集潮陽人丰儀峻整見者起敬自少以穎  
敏稱刻意讀書凡經傳子史百家靡不究竟兼以卓  
聖妙絕時髦嘆服暨入邑庠博洽春秋書史最後銳  
情於詩卒以詩成其所教人讀書於膠轄肯綮處多  
有致疑義洞燭其微剖析詳明以啓迪之平日為文

淵奧雄健上司考校毋出人右將應賓興聲遠播  
及角藝秋闈果中末樂辛卯嘗選會試南宮弗捷授  
以教職秩滿擢陞周府長史歷俸年深輔導之功  
居多晚年工於述作有文集若干卷梅花等詩藏于  
家塾長子曼早服廷訓後從劉主事習舉子業念二  
親仕遠方弗終其業以一女有淑德冊為項城王妃  
曼封南城兵馬副指揮次子曰昇神采玉立絕類離  
群選為周府儀賓

李亨字嘉會博羅人以春秋中末樂甲午鄉試戊戌

會試乙科授廣西博白教諭改四川珙縣遷國子監  
學正亨博學能文居官勤于講授謂五經惟春秋屬  
辭比事難見要領乃撮其大指爲一編曰麟經管中  
豹謂諸史浩繁非初學所能盡覽復撮取其要爲一  
編曰青史節要以便諸生講習課試之文或背理違  
式則親爲筆削少有進益則加獎勵於是學者競勸  
故博白珙之人文漸興實亨率之以子顯貴贈工部  
侍郎

劉玘字允璋潮陽人生而聰敏博學強記永樂丁酉

領鄉薦第一辛丑登進士授南京兵部主事以年老  
乞歸田里文章學業後輩得其指授為多以疾卒于  
家

黎進字景升順德人穎博能文日與論議授以楷法  
問商確時出新意成化乙酉領鄉薦卒業胄監嘗為祭  
酒丘濬所稱授金華府同知當道有述作必出進手  
罷歸構羅江書院吟嘯其中凡賀慶贈禱頌德勒功  
哀誄銘表人多求之一時薦紳亦皆推遜以為莫及  
有求誌生壙者以腴田百畝為壽誌成竟返其券垂

老命工像其貌于書院又自誌其墓其曠達如此有  
草庭藁藏于家

葉孟昭字文明保昌人領永樂癸卯鄉薦歷潯州京  
衛教職選臨江教授人品磊落議論英發為文有思  
致所至學者仰之嘗主試山東遷魯府左長史屢  
有規正皆見嘉納大為賢士所重稱先生而不名每  
乞歸不許終于任王悼惜之賙贈優渥歸塋有遺文  
若干卷

林茂森字良材臨高人少孤事母性至孝其貧力學  
博極群書以春秋領永樂辛卯鄉薦仕武宣教諭勤  
於課士及鄉試中式者五人藩臬諸司異之上其事  
當擢用以母老辭歸養家居以孝弟勤儉迪訓家塾  
及鄉人子弟暮年手不釋卷嘗校註方輿儒林一覽  
行于世大學士丘濬稱其博洽云

吳高字尚志歸善人宣德元年領鄉薦八年登進士  
歷官刑部主事員外郎福建叅政好學能文酷嗜林  
泉既致政幅巾杖屨徜徉山間水際惠陽風物陶寫  
殆盡嘗脩校郡志文譽稱一時云

李孜字日孜保昌人博學多聞尤邃于書正統辛酉  
領鄉薦歷南靖寧遠豐城三邑教諭遷淮安教授才  
以學富詞氣和平善於教人雅有高致明倫堂傾圮  
不勞郡邑捐貲鼎建仗義多類此士子至今慕之三  
典文衡所至得人時名公陳選獨推重之謂真五經  
師也大學士丘濬欲薦以館職會孜引年不果孜性  
狷介負氣岸與人寡合然能克已處物為文典贍有  
法尤喜蒐郡中遺文故實一時號為博雅雖位止儒  
官而譽望特重所著有林塘集

王文友字志民南海人當元末草昧艱屯之際能卓  
然自淑以才行稱被徵召 命至有司勸駕弗應族  
里促之弗應親友諭強之亦弗應喟然歎曰象以齒  
焚翠以羽傷以自耀也聖人之戒人也隱而未見行  
而未成君子弗用也壯趾征凶其孚窮也吾何往焉  
遂韜光以終其身易曰高尚其事詩曰碩人之寬公  
之志也公之孫漸遠篤志好古為時名碩而公之學  
行日以顯世所稱幽人之貞非耶

馮載字克任號埜庄南海人先名祥弱冠補邑庠生



廉憲薛公噐之委幣使于白沙先生慨然有求道之志遂棄舉業講明心性之學秋試期逼薛諭以引薦意不顧強之復學亦不應遂留受業焉比歸白沙先生贈詩稱許之自是言寡默學問精詣湛甘泉稱公能隱居以求其志謹孝祀敬父兄貌莊禮恭行修言確以嚴教子而以義睦族雖擬諸陳太丘可也子教徽同領正德庚午鄉試徽歷官按察僉事贈公如其官孫士懋秉禮矢誨恂恂有古人風曾孫良棟領乙酉鄉試第七名敦重有大噐是能亢其宗者

方權字用中以字行別號亭秋出福建金紫光祿大夫宗元公之裔來居南海占籍焉公生而聰慧日記萬言既長貌狀魁梧聲如洪鍾肆力稽古自六經子史百家以及天文地理醫卜伎藝靡不研究嘗借人宋史二日還之已盡識其大義其強記博學時儕輩咸遜避弗及嘗曰祿仕無所用之絕意仕進而圖所以不朽者聲聞日起從遊者日衆橫經質疑者日數十人公以次條答各因其質而造之古今禮文度数沿革世所難知者公獨考證詳明時人以其博洽因號

曰方書櫃云公聞之咲曰吾之書豈徒藏諸櫃乎將寄之子孫以用于天下康濟斯世其志蓋如此後子遂舉鄉薦為全州學正孫獻夫舉進士歷官吏部尚書武英殿大學士贈公如其官果符公所志焉公性狷介淡泊無營至周人之急即解衣脫驂不吝居家有禮終日衣冠危坐早起謁祖祠畢即據案吾伊夜誦必漏下二十刻始休與士語勸以清勤砥礪與鄉人語勸以孝友節儉里有訟者聞公之風輒愧而止年八十而卒所著述多散佚唯亭秋集十卷行于世

蔡仕儲字鍾秀瓊山人質粹行純博極群書通五經年十八為人師年長以倍者皆北面執弟子禮有河汾之風有司示欲周其貧堅守齋如也高雷之士越海從游甚衆領薦遊太學發尚書人心道心之旨申明義利之辨門人林叅政士元亦贊其為道先覺潛德化鄉云學者稱石南先生士元字舜卿罷官歸戴笠躬耕不入城市瓊人賢之

梁繼灝字行素新會人林坡黎貞高弟子博學有行誼嘗以書授生徒後白沙陳獻章稱之曰吾邑以文

行教後進百餘年秣坡一人而已余生也晚不及秣坡之門及長而與澹齋之子益游始拜澹齋澹齋誼余以秣坡之事縷縷此豈一日忘其師者耶當時在秣坡之門者不少獨澹齋傳其學教授羅山之下使弟子有所矜式焉其見稱類此邑人魯能吳韶鄺慈皆出其門子益登景泰丙子鄉薦知興業縣益子文任衡山訓導皆能世承儒業

黃瑜字廷美香山人幼聰穎明尚書景泰丙子舉于鄉入成均以經術為一時冠天順初天變求直言應

詔疏上六事一曰正身則天下治二曰正家則天下定三曰正禮則天下化四曰正樂則天下和五曰正稅賦則天下富六曰正軍伍則天下安凡數千言觸權貴將得罪賴吏尚王翱戶部侍郎薛遠拯之而免成化己丑乃授長樂知縣首捐俸遷建學校日與諸生講學時科目闕有間矣自是魯瓊林廣連舉于鄉兄弟有相訟者開導以因心之義皆涕泣受教退讓而去以勁直忤當道浩然求去民攀留不可則立其生祠既歸徙居會城番山下手植槐二構亭吟嘯其

中自稱雙槐老人曰子孫能更植其一則吾志畢矣  
蓋晞蹤三槐也為學以存誠為本嘗自誦曰不欺心  
不欺人合內外而一之誠也置朱子語類及唐音杜  
詩于卧所晨起讀語類以析疑義暮則詠詩數章而  
後就寢於聲色紛華一無所好卒年七十有三所著  
有雙槐集及歲抄傳于世

陳猷字公遠東莞人自少勵志聖賢之學博覽群書  
充然有得領成化戊子鄉薦上春官不第卒業國學  
時瓊臺丘濬總理教事較其文為首選以大魁期之

充樂於取友徧交當世名士蔣冕費宏廖紀吳廷舉  
皆道合者也歸與白沙陳獻章論甚相得遂厭科舉  
學隱居四十餘年嘗於居旁闢土為壇號風日壇日  
與學者講論其上悠然有自得之趣其貧樂道晏如  
也當道多重其為人至邑以禮延見以為有道君子  
叅政蔣曙有檄旌云行止端莊學問優贍淡泊自如  
足迹不履乎城市節義是守賢聲久著於鄉閭非惟  
增重士林抑將表勵風俗晚得子僅彌月而猷遂疾  
革年已八十七矣人謂天道有知云所作有金臺蘭

陵吳興崆峒等稿藏于家笥

黃結字資友東莞人受益之子領鄉薦就天河教諭居僻陋益肆力於書史陞泉郡教授兩主鄉試樞要家以白金五百兩為其子關節且許保薦為御史結斥絕之泉人又廢于學結嚴立科條士皆激發科第自是驟盛復擇生徒之穎敏者數人授以春秋後皆得雋泉中始有春秋之學矣九載赴銓曹考為天下教官學行第一陞遼府右長史多所規諫王稍疎之又乃知其賢後丁內艱起復轉岷府而卒孫閱古字特準以進士官至福建都轉運使

陳其魯字思穎別號巨川性至孝事澹泉公惟謹幼好學弱冠應試第二名入為博士弟子員覺山洪公同受學於其泉先生相得懽甚後杜門執圃者二十餘年子堂克承庭訓領乙卯鄉薦登戊辰進士授嚴州推官迎養宦邸公諭之曰吾不患汝不廉患不恕不患汝不明患不平堂恐遵教克恪于官召入為監察御史隨養留都官舍朝夕聿嚴鎖鑰父之拂衣歸萬曆初覃恩封監察御史衣服僕役一如諸生或

諷之曰吾豈以軒冕桎梏哉日以詩酒自適招携同志遨遊白雲蒲澗之巔觀天風海濤徜徉嘯歌時隼星晝見公憂形于色爲詩曰

聖皇今在上愁見彗星明其心不忘于世如此庚辰夏卒值叅議公以覲歸得視含歛時歎爲孝感所致

湯朝達字邦顯番禺人弱冠補庠生下帷講業淹貫于史學者多師之德器春容儀度整戢見善若已出惡卽爲之掩覆嘗被酒昏憤及醒而愧卽具衣冠告于祖考令其弟箠朴之痛誓自新因號戒所真勇於

改過者女適中丞李義壯素以節操自持而視公行履尤相敬重其狷介大都天性然也晚益貧賣室廬以終歲中丞以一室館之疏食水飲不改其樂督學吳默泉張萊溪咸嘉獎之精于詩律晚學朱晦菴風流醞籍與李子長頡頏而持正過之門人如唐戶曹守勳輩多知名

陳彥際字道章別號環碧幼聰悟嗜學祖父靜齋公最誨之弱冠補從化弟子員屢入棘弗第癸丑赴銓授福建建寧司訓至則與寧士講究課業砥礪行檢

一時髦俊奮起貧者捐俸助之憲副朱東光為諸生  
公知其偉器尤厚待焉陞吉田學諭寄寓桂林至則  
請修宣成書院集諸生搗文講學嚴却餽遺布衣蔬  
食怡然自得士人樹碣以表之尋陞柳州府學教授  
朔望陞畫集講宗程朱大義柳士始知向方又選其  
秀者捐俸按月試之士益思淬濯以自表見未幾晉  
藩官辭不拜會子大猷中戊辰榜進士迎養歸日與  
詩朋道友遨遊水石削迹公門而於宗姻貧者竭力  
周之以子貴誥封中憲大夫柳州知府年八十卒次子

大期亦領鄉薦任宜山尹有治聲

葉春芳字應元別號兩峯惠之歸善人父標母鄒氏  
年十九而寡遺腹生公母茹荼鞠之公幼而秀發穎  
悟及長聞母稱父生平即灑淚悲泣矢志思報十五  
試為郡庠生督學考輒居首莊渠魏公嘉之聘為社  
學師凡七入棘試弗遇選貢遊南監祭酒湛甘泉公  
大說之遂受學焉日益淬礪嘉靖壬寅謁選授福建  
古田縣丞盡却常例不其於流伍確然有高世之志  
院委署旁邑民皆愛戴若父母又署本邑政務大舉

建社學行鄉甲祛虎患禱甘霖三載政平訟理民歌  
頌之上司有訝其踈慢者厲聲曰豈不折腰人耶公  
應聲曰兩峯山水當不嫌吾踈慢遂拂衣歸士民遮  
留爲立去思碑公歸即葺永思堂以志孺慕其志浩  
然不囿于俗其持已以正治家以嚴臨財以廉睦族  
以義與人以忠教子以詩禮族人有於其少時肆害  
者置弗較曰吾同祖一氣也豈容異視耶赴選時有  
欲爲託書薦者公曰吾素不事干謁豈今改節耶其  
自持如此又輕財重義周困恤孤鄉族共推服之年  
六十有三子五人長夢麟由貢生授如臯縣主簿次  
夢奎次夢陽次夢熊登乙丑榜進士歷三邊總制南  
京工部尚書加太子太保贈公如其官此皆公垂裕  
克昌之烈也甘泉先生稱公祈雨而雨降驅虎而虎  
除禦賊而賊遁政行澤流程松溪稱公慷慨直衷得  
諸兩峯之磊落弗窮不折腰人得諸兩峯之參雲倚  
空則公之賢可知已

侯天錫字尚思別號退岩南海人天性至孝執親喪  
哀毀逾節歲時廟祀一遵家禮尤慷慨仗義事叔南



隱君如事其父與人交久而能敬樂易坦率不為町畦嘗推所積以周親友之窶者人多樂與之交素知績學有弗愜意者輒稱詩謝遣之嘗曰陋巷一生顏氏樂清風千古伯夷貧蓋其素志也以子國治貴奉誥贈奉政大夫戶部郎中後國治歷叅政致仕今年躋九十精神如少壯人謂退岩公積德昌后如此黃民準字邦直別號慎齋順德人少有文名屢試弗第應嘉靖元年貢授福建政和縣學訓九年滿補廣西平樂府學訓徐陞富川縣學諭嘉靖戊戌以下繼毋憂遂隱不出公三仕為學官率諸青衿講學考課甘坐寒氊不受贊節十八年如一日也今彼中人士尚嚶嚶景慕之其甄陶人才模範士習所裨翊世道豈訥哉既致仕年已七十餘師事甘泉先生講明心性之指平生苦心問學矢志聖賢居已甚約與人甚恭而持論甚正其天性渾厚正直無疾言遽色亦不以非禮徇人甘泉先生雅重之呼為老友年九十卒卒之前數日猶手不釋卷所遺二子者皆其先產毫無增也子應龍能繼其志領鄉薦任武昌知縣績最奉

勅贈公文林郎如其官今龍任戶部主事司倉監允  
以清直敏斷蜚聲其揚公芳休者駸駸方熾云

外史氏斐曰予讀董生賈傳書未嘗不掩卷嘆  
也董淹貫經術賈通達國體其言皆可見之行  
而不獲大用于世經綸之蘊鬱而弗舒二子何  
心焉嗟乎文學弗足經世雖工何益有之而弗  
竟其用於學何損是故君子貴自鏡也予鄉先  
彥蜚馨文學之林者弗尠漢若陳元之張左氏  
楊孚之論喪制董正之表儀鄉國王範之著春秋

劉軻之學通麟經區冊之見重昌黎林巽之精  
裁文胡賓王之著漢史彬彬乎各有董賈之志哉  
皇明益廣崇文之化其友信深明易學馬名廣條上  
五事黃勳號稱學圃梁宏標為奇才而唐豫陳  
迪廖謙黎暹吳高黃瑜陳猷黃結方用中湯朝  
達葉春芳陳彦際侯天錫黃民準輩詵  
詵濟濟謂皆一代之碩儒非與故次之于篇

大心卷之二十三終

粵大記卷之二十四

嶺南郭棐篤周甫編

獻徵類

詞華黼藻

唐盧宗回 李文儒 邵 謁 揚 環

五代孟賓于 陳 拙 鄧洵美 張 恂

黃匪躬 周克明

宋藍 奎 黃洞 徐信 陳仲輔 古成之

李南仲 譚惟寅 梁弼直 陳 渙

曾躍麟 蔡齊基 唐文嚴 趙東山

蔣科 黃景賢

明孫 賁 王 佐 黃 哲 趙 介

李 德 黎 貞 周尚文 鄧 林

林士猷 鄭 毅 歐觀生 何子海

董 珣 梁 敏 吳宗直 林文亨

王克義 郭張善 陳 衡 何潜淵

涂 瑞 康 麟 倫以叙 黃 佐 倫以訓

林大欽 陳建倫以詵 李時行 何翼梁有譽

黎民表 歐大任 馬 極 劉克正 羅道潘 光統

盧宗回字望淵南海人少時讀書日夜忘寢食同舍

生見其所作嫉之假以他事毆宗回宗回遜謝惟不

與校由是為鄉鄙所重舉元和十年進士官終集賢

校理久之聞父有疾浩然乞予告歸卒宗回嘗寓長

安有題慈恩寺塔詩時人傳誦愛之為刻木榜至今

存焉宗回詩東來曉日上翔鸞西轉蒼龍拂露盤渭

水冷光搖藻井玉峯晴色墮欄干九重天闕參差見

百二山河表裏觀暫輟去蓬悲不定一凭金界望長

安沈括筆談亦載此云

李文孺字元質南海人少善書札漸擿文藻以詞翰

知名仕為番禺從事元和中應湖南徵辟道樂昌遊  
泐溪石室衆推作記揮毫立成情景畢萃見者駭服  
轉觀察推官罹憂東還帥府孔戣甚重之延為記室  
每事周咨會韓愈謫潮州刺史請於戣加優禮戣從  
之月給送使錢文孺謝不受時論兩稱其賢後在湖  
南以侍御史充節度判官江陵有兄弟甲科者召讌  
固辭帥譙其傲幕客不能終篇文孺為足之曰讌讌  
棣華異有懷而靡及幡幡瓠葉同式飲以庶幾誚其  
非奉使也其人惶恐謝過成禮而去帥大悅厚幣謝  
之性剛方嚴重竟以舉刺忤帥罷歸家徒壁立惟玩  
圖讀書而已曾孫休亦好學有祖風致  
邵謁翁源人少貧賤屈為縣吏令有客至目使搯牀  
者三謁不應又頤指之者三謁不應令乃怒慢罵之  
謁瞪視曰咄吏豈供汝搯牀者邪且讀書干祿亦易  
與爾大丈夫當仰居人上安能俯為人役令益怒大  
言曰死狗胥敢爾盍牽來於是左右提曳之謁不為  
動掉臂而出握刀截其髻着縣門矢之曰苟學不成  
有如髮發憤讀書用間晝夜築書堂隱起水心距縣

十里許平居雙髻蓬然如里中兒親友多笑之謁不自沮也久之博通經子百家束髮苦吟尤工古調學既成爲有司所舉抵京師隸國子聲華焯焯於薦紳間有詩一卷翁源人刻之傳于世

楊環南海人力學工詩隱居羅浮咸通末登進士第初任省時夢登高臺耘草得玉麟及除弘文館校書郎人賀曰子居是職所謂麟臺芸閣也始悟所夢拜官後時事日非即拂衣歸隱至德令周繇與環友善極稱許之又有黃隱居者家于朝臺往來羅浮與環

莫逆日以琴樽自娛時人稱曰南濱三隱

孟賓于字國儀連州人少聰穎游鄉校力學不怠父以家貧且賓于無他兄弟力止之賓于進曰衆星不如孤月明牛羊滿山畏獨虎父奇其志晉天福九年登進士第仕湖南幕官歷縣令水部員外郎終郎中賓于能詩有盛唐風致工部侍郎李若虛廉察沅湘日賓于以詩數百篇號金鰲集獻之大鳥稱賞因採集中尤異者數聯馳書朝署聲譽藹然李昉者同年進士也與之友善後昉仕宋官翰林學士而賓于猶

為南唐郎官寄賓于以詩蓋惜其不顯庸也後歸老  
于鄉號玉峯叟年八十卒賓于以詩鳴為世所重性  
好獎拔後進新塗令李有中者詩有乾坤一夕雨草  
木萬方春之句賓于彌為方干賈島之徒有中由是  
知名宋陳堯佐序其金鰲集有云如百丈懸流轟轟  
灑落蒼翠間清雄奔放望之豎人毛骨自五季詩人  
以來未有過賓于者也今其集不存族人嘏字子純  
性落魄耽詩酒多遊僧寺太平興國中自吉水還故  
鄉逾年卒十餘年後其友成務崇於江左遇之以為

得僊云

陳拙字用拙以字顯連州人少肄習禮樂尤長於詩  
天祐元年擢進士第授著作郎見朱溫弒逆遂假使  
節南歸謁清海軍節度使劉隱隱與悟大悅遂留用  
之未幾溫果篡位改元開平用拙勸隱仍奉天祐年  
號隱是其言而不能用遂掌書記攝觀察推官比隱  
病篤用拙撰表請其弟節度副使巖權知留後乃薨  
巖襲其位益信任之乾化四年奉使吳越吳越王錢  
瑒與語稱其專對資以金幣用拙遜謝歸以獻巖巖

稱南漢遂用爲吏部郎中知制誥卒用拙明悟音律  
著大唐正聲琴籍十卷載琴家論議操名及古帝王  
名士善琴者古調無徵音仍補新徵音譜其法以四  
弦中徵統會樞極黃鍾正宮合南呂宮無射商卽徵  
音也知音者皆祕之其書遂不傳

鄧恂美連州人有敏才工詩賦時湖南朱昂博學號  
朱萬卷士類無當意者獨推遜恂美天祐中與孟賓  
于並爲李若虛薦入洛陽擢進士登第後還家爲湖  
南節度使周行逢所留辟爲館驛巡官置幕下恂美

背偃時謂之鄧馱子性頗迂僻如其形衆多不悅之  
者行逢因此禮待日薄故雖處府僚而食不暇給同  
年王溥爲相聞恂美不得志乃寄詩曰綵衣我已登  
黃閣白社君猶窘故廬自是行逢稍優給之未幾翰  
林學士李昉亦恂美同年也召至傳舍相見話舊不  
覺號慟因倡和欵談竟日行逢疑其泄已陰事呵責  
之黜爲易俗場官須臾又使人詐爲山賊突入官署  
殺之聞者無不慟惜行逢猜忌鷙酷群下多以譖死  
其妻嚴氏遜於郊以避害至是又殺恂美士流益不



附後李昉再銜命祠南嶽知恂美墳在近徒步百里  
為詩哭之古人布衣交未有若昉者也

張詢字正言南海人家貧力學工於詩性行孤潔不  
下書帷而百爾藻藝莫不玄悟超絕舉進士不第後  
流寓長安以畫自適善貌吳中山水中和年隨車駕  
至蜀中人重詢名爭詣求之嘗為昭覺寺僧夢休作  
早午晚三景於壁間謂之三時山僖宗駕幸茲寺見  
之歎賞彌日以是與夢休交善值唐亂遂依托焉王  
建據蜀稱帝其太子簡王欽遷畫於東宮為壁泥通  
枋移損不全乃寢

黃匪躬連山人負詩名有志大惟憂國恩深豈顧身  
之句登唐光啓三年進士與鄧恂美胡君昉並名于  
時先在江西鍾傳幕掌奏詔楚王馬殷傾慕之值匪躬  
使事至殷大喜盡蠲其門戶租稅君昉隱居嘗遇羽客得  
吐納長年術二人皆有集而君昉集號蘄川其句有曰水邊  
閒詠處雲島月斜明人以為得詩家三昧云

周克明字昭文傑之孫茂之子也精於數術凡律曆  
天官五行讖緯及三式風雲龜筮之書靡不究其指

要開寶中授司天六壬改臺主簿轉監丞五遷春官  
正充明頗修詞藻喜藏書景德初嘗獻所著文十篇  
召試中書賜同進士出身三年有大星出西衆莫  
能辨或言國星妖星為兵凶之兆克明時使嶺表及  
還亟請對言臣按天文錄荊州占其星名曰周伯其  
色黃其光煌煌然所見之國大昌是德星也臣在塗  
聞中外之人頗惑其事願許文武稱慶以安天下心  
上嘉之即從其請拜太子洗馬殿中丞皆兼翰林天  
文又權判監事屬脩兩朝國史其天文律曆事命在  
明參之大中祥符九年坐本監擇日差互例降為洗  
馬天禧元年夏火犯靈臺克明語所親曰去歲太白  
犯靈臺掌曆者悉被降譴上天垂象深可畏也今熒  
惑又犯之吾其不起乎八月疽發背卒年六十四克  
明久居司天之職頗勤慎凡奏對必據經畫言及卒  
上頗悼惜遣內侍諭其壻直龍圖閣馮元令主喪事  
賜賻甚厚初諸僭國皆有纂錄獨嶺南闕焉惟胡賓  
王胡元興二家纂述皆不之備克明訪耆舊采碑誌  
孳孳著撰裁十數卷書未成而卒

藍奎字秉文程鄉人性強記書不再閱家無圖史或  
假於友越宿則歸之問之輒能成誦嘗有詩云懶思  
身外無窮事願讀人間未見書其志學如此第進士  
官文林郎郡博士嘗授詔校文福州文章氣節稱為  
藍夫子云

黃洞字明達南海人性度玄曠博學能文自經史百  
家以至浮屠老子之書用不究心焉舉進士于鄉數  
奇竟不得薦南省元祐初蔣之奇知廣州初下車即  
聞洞名遂與之相往還談今古罄底裏終日由由然  
不相舍也時或出筆札互倡酬之奇自以為不及會  
妖人構亂洞為之奇畫計先事平之之奇最其才能  
紹聖改元蘇軾以寧遠軍節度副使安置惠州時往  
乘南海洞又與軾遊焉嘗同軾登鑿空閣軾賦詩有  
曰黃子寒無衣對月句愈警者即謂洞也元符三年  
十一月軾被命北還洞與吳復古何崇道李公弼林  
子中頴堂通三長老自番禺追餞至清遠峽同遊廣  
慶寺而後返洞為詩瑰奇時出新意為人所傳誦然  
志大才疎竟不及顯庸云

徐信南雄保昌人皇祐壬辰進士蘇軾謫海南造其  
書齋見信作甘露寺詩平地風烟飛白鳥半空雲木  
捲蒼藤軾以橫字易飛字信廼嘆服

陳仲輔歸善人博學善屬文工於隸篆為世所重嘗  
作枕屏篆五箴文遺侍講陳鵬飛鵬飛以詩答之極  
其獎賞晚以特科授邑管察推鵬飛贈以詩幕下誰  
人識杲之微聞贊畫向蓮池登樓不恨鄉閔遠柱笏  
只言山色竒直道自能消鬼魅高人何處不軒羲他  
年坐上話銅狄可是蓬萊清淺時

古成之字垂與本河源人五季末居增城性簡靜寡  
欲結廬羅浮山學貫群籍時出吟咏語多驚人宋初  
嶺嶠鮮文士雍熙改元成之獨應舉督府勸駕詩云  
寰中有道逢千載嶺外觀光只一人明年上春官奏  
名梁灝第一成之第二有張賀劉師道者嫉南人名  
居其上夜召成之飲以啞藥比黎明臚唱暗不能應  
上怒其不恭扶出之報罷成之竟不自明曰司命者  
自有定分時服其量端拱初再舉登第同放榜二十  
八人時謂應二十八宿都下競傳賀師道事成之力

謝無有太宗嗟賞之宋興廣州舉進士自成之始云  
初調元氏縣尉以廉能改知益都縣以惠政聞召試  
館職除秘書校書郎張詠與語深器之李順之亂詠  
知益州辟成之知觀城縣蜀當王繼恩殘暴之後老  
幼流徙成之加意煦育之運米以賑饑發藥以療病  
活者數千人復知漢之緜竹民大向化有古循吏風  
嘗作思羅浮賦慨然有歸志未幾卒人皆惜其負經世才  
不究其用所爲詩有鳳騫霞舉之志時稱紫虛先生  
生吳文燦捐地庀材建祠祀之其仗義可嘉已

李南仲英州浚陽人少穎悟日記數千言閱數月師  
友詰之聞書朗誦一字不差十歲舉神童遂中童子  
科元豐以後賜出身者五人南仲其一也授從事郎  
歸省其親自以學未大成遊于羅浮之麓誦讀不輟  
提舉儒學司韓謹劉晞皆重其工人行人名其地曰李  
秀岩云大觀初授奉議郎知康州以治行聞嘗著羅  
浮賦其畧曰羅浮二山東西相聯邇句曲之洞號朱  
明之天連接大江之外崛起滄溟之壖乃百粵群山  
之祖與南岳而齊有鐵橋鎖乎絕頂石樓峙乎半巔

登覽遐極眇睇羊綿爾其週迴五百七十二里森列  
四百三十二峯迴谿峻谷巖嶮崆峒藻石璀璨瀑水  
玲瓏山出玳瑁竹茂籠葱群雀五色靈藥千叢寂寞  
兮丹砂遺電爰藥兮瑤臺隱空懸厓斗折徑路難通  
祥雲瑞霧晝夕朦朧時有岸幘羽服野人山翁忽去  
倏來不知其蹤謂長生而又視亦往往寓乎其中時  
有萬舶乘風不知西東瞻我峻極烟花蒙茸洞谷黑  
昏開乾闥坤怒風叫號轟騰四門恍然之內隱隱若  
萬兵之屯呼吸號召鬼神湊奔徐而萬籟息朝霞激

日月晃耀氣象始溫又或五夜蕭森樂池奏音彷彿  
仙籟彈絲擊金疑有雲和之瑟空桑之琴青谷闕邃  
列仙下臨聚會靈族朋來盍簪列席環坐開廓冲襟  
踈楹廣庭寶除翠林海桃霞漿左右酬斟樂真言之  
恬澹憫世網之浮沉倏然往來不繼以滯瞬息萬里  
敢聽馭之駸駸變化倏忽孰能究尋其上則有惟金  
三品榘柎杞梓翡翠羽毛虎豹犀兕竹箭丹砂絺纈  
絲枲玳角縹桶元龜象齒石蜜山蕉黃精白芷蛾眉  
龍骨桂香桐子先供實以充庭何九州之敢擬真足

以燦上國之文章增星家之盛美矧夫當祝融之宅  
位贊真主以乘離雲行雨施產英孕奇其在國家有  
大禱祈驛使奔走帝誠肅祗投金龍與玉板指道路  
以交馳將事之夕明靈鑒斯乃至翔鸞舞鶴繞殿紫  
芝仙壇祭訖宣室受釐萬有景福允王保之帝子王  
孫慶流本支獻南山之壽歌天保之詩與夫他山頽  
壁徒當乎四達之達至飾別館止可事乎遊嬉於功  
業兮何補於造化兮何裨豈止增高福地薦美天基  
鞏固四極鎮安外夷巍巍隆隆無騫無虧宸毫必由  
文采葳蕤瑞謀顯著又奚論乎真區之遠而

譚惟寅字子欽高要人紹興二年登進士第讀書一  
覽終身不忘常夜入嚮州祥符寺閱古碑就僧假燭  
不至遂以手摸之歸即錄所記黎明對本不遺一字  
應博學宏詞科用參政龔茂良薦除太學博士出倅  
靜江容州提舉廣西監鐵事尋遷廣東提刑改江西  
提刑卒于官端州人祠于鄉賢有蛟齋講學大學中  
庸行十世

梁弼直高要人通五經博學強記五魁鄉舉號為梁

書櫃秘書張宋卿守端州延之齋閣甚禮重之調荔  
浦尉以除盜功轉鬱林僉書一日假寐夢西海府君  
牒請至殿庭講賓主禮請撰水城記梁援筆成之覺  
而錄之次日無病而逝其遺文尚有能誦者

陳煥字少微博羅人安貧守道敝衣蔬食處之晏如  
也接物甚謹雖遇童稚無異成人以禮遜化閭里之  
橫逆者鄉人稱之曰陳先生提刑芮燁嘗屏道從造  
其廬見四壁蕭然贈以詩云原思非病貧何患回也  
雖貧樂有加歲晚與誰同此味梅花深處是君家煥  
詩清勁傳於世者幾百篇其咏梅花云雪裡溪橋獨  
樹春客來驚起曉粧勻試從意外看風味方信留侯  
似婦人

曾躍鱗字子龍陽江縣人少警敏博通經史為詩文  
立揮即就素善講書人多從之遊淳熙五年登進士  
第初為羅源簿設法弭盜闔境以寧擢汀州通判歷  
任皆有政聲受知於學士李彥穎薦入秘書少師陳  
俊卿尤器重之會諫官缺人俊卿以躍鱗名上遂拜  
監察御史紹熙末災異數見奏請避殿戒膳以承天



心仁愛預侍從兩省同班奏事多見施行朝著重之  
所著有集數卷今惟傳二律其遊王母岡一首岡空  
雲散靜如銀石磴層層接九宸翠竹影搖湘浦夜碧  
桃香鶯武陵春但看此日燒丹竈不見當年駕鶴人  
遊徧瑤池歸去晚一聲長嘯月華新聞西浦漁歌作  
一首西浦鳴榔下釣磯歌聲欸乃送斜暉扣舷互答  
驚鷗夢拍手歡呼看鷺飛山接素琴仙子過洲連青  
草使君歸海天空闊家長在一任蘆花雪點衣

蔡齊基字夢傳連州人篤學業文年十九預鄉薦嘗  
著周易述群九卷大意由象數而理於義以為三古  
四聖尊君卑臣進陽退陰無非為天下安危治亂計  
嘉定八年為瓊州戶錄瓊莞安撫趙善譚東萊呂祖  
謙門人也見其書大喜騰寫進于朝叅政樓鑰報善  
譚書曰澧州有此文人瓊莞有此僚屬王孫典遠藩  
而能取此書奏聞使行于世皆所罕見也齊基詩尤  
高嘗自謂少從竹林先生徐張學詩得四大法門律  
詩學老杜長篇學東坡絕句學荆公古詩學魯直訓  
迪後學每以此教之

唐文嚴字克寬瓊山東廂人任迪功郎宋末隱德不仕建一亭名曰松軒日逸其中留意經史景炎間翰林學士陳仲微省郎謝少敏抵瓊臨訪合歡終日改其軒名曰廣庵有詩相倡和云

趙東山東莞人系出濮邸博學能詩然性高古不諧流俗遇談勝國事則掩耳不聞嘗登鳳凰臺以舒懷抱其志行汗漫超越浩不可禦視世間事無足當其意數來亭頭遊法性寺海月巖每憑高瞻望崖山之雲則悲歌慷慨涕泗潛焉交下雖屈平之忠愛不是過也逢佳山水輒有詩成刻于石者凡數歲久磨滅不可讀惟題海月巖近體二首石刻猶存其詩極為入傳誦野仙則其自號云

蔣科字進之高州電白人少穎好學通尚書周禮父從事郎南夫奇之曰能取科甲必此兒也初名聖傳因更以科焉兄思問已正奏名益自奮勵遂登寶祐丙辰進士為瓊州教授篤意教養較文以器識為先咸淳二年捐貲脩學移建御書閣于講堂北其費甚浩三載而後成提學論其才以其持廉潔薦于朝秩

滿僅擢僭之宜倫令撫輯裔峒教以詩書於聲利澹  
如也後卒嘗謂同年楊應辰必貴而壽但當堅慎臣  
節爾後攝雷州降元為庶訪使果如科言

黃景賢字希賢海康人由邕州路教授陞慶遠天河  
縣尹仕至靖江路推官致仕有文學自號愚谷至治  
癸亥文宗潛邸于瓊因獻詩為所嘉賞蒙手書愚谷  
二大字賜之天曆中復有六花宮袍之賜善詩嘗賦  
老将詩以自况人傳誦之老将詩瀟瀟夜雨泣金鎗  
夢過交河古戰場醉誤臂鷹呼走卒閑思調馬虜先

皇黑山戍後田園廢青海歸來歲月長日盱西涼初試  
獵猶存矍鑠一分狂

孫蕡字仲衍南海平步人性敏慧姿表瓌秀於書無  
所不讀為詩文伸紙揮毫頃刻立就初若不甚經意  
而氣象雄渾興致深遠駸駸乎魏晉之風自少負節  
槩不妄交而兒童走卒莫不稱為孫先生國初東莞  
何真保有南海洪武改元征南將軍廖永忠至真求  
蕡作書請歸附曲盡誠款永忠不戮一人而南海帖  
然者蕡之力也永忠尋徵蕡典郡教三年庚戌始詔

天下設科取士蕢舉于鄉至京師授工部織染局使  
尋出主虹縣簿時經兵燹十室九空加意勞來民還  
其業甫一載特選入為翰林典籍學士宋濂樂韶鳳  
承旨詹同亟稱之日侍上左右奏對敏便而容觀飄  
逸濂輩皆自以為莫及八年預脩洪武正韻九年以  
奉常之節監祀于西川居翰林三載力求補外為平  
原簿無何以事逮繫有旨輸左校板築蕭垣望都門  
謳吟為粵聲督工者以聞召至上前陳所作詩皆忠  
愛語特命釋之十一年罷歸田里遨遊雲林中益肆

力於問學所見益深有輕死生齊物我之意嘗和陶  
潛歸去來辭以寫其情其一曰懷靈荃志不忘君也  
十五年被召拜蘇州府經歷蘇為東吳劇郡素號難  
治蕢樞畫有方政用太和二十二年以事謫戍遼東怡  
然就道酌酒賦詩無異平日時都帥梅思祖節鎮三  
韓素聞蕢名迎置家塾是年竟以藍黨見逮人皆勸  
其以疏自明蕢不答歌一詩長嘯以就刑有黃泉無  
客店今夜宿誰家之句天下寃之年五十有六門人  
黎貞時亦在戍奉柩葬于安山之陽蕢平生撰述甚

富既沒諸書多零落弗存番禺趙絢稱其究極天人  
性命之理濂洛閩之學為嶺表儒宗官雖不甚顯  
而所至有聲出處窮達夷險一致所著有西菴集傳  
于世

王佐字彥舉系本河東元末侍父宦南雄因寓廣州  
占籍南海時孫蕢與佐結詩社于南園開抗風軒以  
延一時名士佐才思雄渾體裁甚工蕢深重之構辭  
敏捷王不如孫句意沉著孫不如王會何真開署求  
士與蕢首被禮聘真敬重其才使掌書記軍旅事多

見咨詢李質者德慶豪帥也據有肇慶佐恐其有異  
志與蕢往說之得其歡心質遂通好然質尤號好文  
義衣冠之士多往依之其尤知名者則有江右伯顏  
子中茶陵劉三吾建安張智歸言於真使招致之由  
此士凡以一藝名者真皆館穀焉洪武六年用部使  
者薦拜給事中論思補闕恒稱上意學士宋濂嘗  
拜賜黃馬上為歌命諸詞臣和之佐斯須而就清  
新富瞻如宿構者有臣騎黃馬當赤心之句上覽  
之而喜賜鈔一錠上遊幸或遇會心處多命之賦

粵大記 卷二十四  
詩三吾嘗同詠署中桂驚其才高語妙以為名世之作其為名流所重如此佐性不樂樞要居官二載即乞骸骨上憐其誠特俞所請陞辭日賜鈔五十千以為道路費士林羨之時天威嚴重臣僚自陳者多被譴斥蓋十人而九佐以恭慎得歸故當時以為難云佐天性孝弟父沒時有廖元正者為料里喪事殯諸南雄之五里山終身事元正如父既貴後元正之子犯法言於有司以已資贖其罪哀慕終身形於著述集多散逸評者比之高適岑參

黃哲字庸之番禺人世為荔灣著姓哲弱冠而孤刻苦讀書通五經嘗借人文選手抄之沉玩究竟遂能作詩造晉唐奧域性好山水結廬蒲澗栖息其中往來羅浮峽山南華諸名勝自以為未足乃辭家度庾嶺過吳楚遊燕齊間一時湖海英豪皆與遊焉當風塵時泊舟秦淮遇朱文昭涂穎輩相與握手吟詠沽酒大噉二人喟曰君才如白雪吾雖知音如寡和何自是益有名龍鳳中太祖為吳王駐師金陵招徠名儒哲為丞相李善長參政張昶汪廣洋所知交薦

之乙巳建吳國拜哲翰林待制入書閣侍 太子讀  
書尋兼典籤輔導盡職 太子愛重之鈔幣之賜無  
虛日居未幾歲旱 上祈雨鍾山獲應 御製七言  
詩志喜命哲賡之其見重如此洪武初奉使青徐諭  
諸友側尋出知山東東阿縣吏胥初以儒士易之哲  
剖決如流案牘無滯且不事矯激苛察民樂其寬一  
縣帖服值旱麥苗盡凋乃齋戒徒跣烈日中詣洪範  
池龍祠禱焉詞旨哀惻耳澍應時優渥民驩呼曰此  
黃公雨也狼溪有恠物為幻竊人啗之哲為文禱于

天須臾風雷大作一青蛟斃水上時經毛貴亂後民  
多流徙他鄉聞哲善政復其業者亡慮數千人戶口  
日滋辛亥四月陞東平府通判東阿士民遮道涕泣  
攀留父老扛輿而至有百餘歲者抵府境乃返尋上  
疏陳時務數十事皆人所難言 上怒其狂斐會山  
東分省奏哲捐俸修先聖祠築積水湖堤有成績  
上乃釋不問哲亦乞歸得允既南還有司請哲領郡  
校事橫經授徒四方至者多名士歲凡數百人乙卯  
四月 朝廷取回山東治在郡註誤竟置于法郡邑

粵大記 卷二十四  
人士爭購之且家為奠祭哲始北上時倚蓬聽雪常  
自詫曰天下奇音妙韻出自然者莫是過也歸構一  
軒名聽雪蓬學者稱為雪蓬先生

趙介字伯貞番禺人博通六籍氣宇豪邁父璟元臨  
江路治中與母連喪介孤憤閉戶讀書遂無復仕進  
意植二松于所居扁其軒曰臨清蓋以淵明自擬也  
時有李辭者南海文士也以薦起介力止之不可臨  
別介泣謂曰堯天雖長劉日實短子獨不為高堂念  
乎辭竟去後倅南康坐累乃歎曰趙伯貞真高士也

介行嘗以一囊自隨遇景即投詩其中絕不為人留  
題縉紳恒病其狷性復不喜接達官貴人日往還西  
樵泉石間獨與八十翁劉樂善者相倡和以自娛屢  
為有司所薦皆力辭免洪武己巳以家累有旨逮  
赴京師道南昌卒于舟中年四十六介頽如渥丹丰  
度類神仙中人尤善教子四子絜絢繹純皆善詩文  
工篆隸時稱四懷絢亦隱居有父風所謂趙懷絜者  
也後純貴贈介為監察御史有臨清集行于世方孫  
贊王佐結詩社南園時一時名士如李德黃哲暨別



駕黃楚金徵士蔡養晦黃希貴黃希文駕閣蒲子文  
進士黃原善趙安中安中之弟通判澄徵士訥皆與  
焉豪吟劇飲更唱迭和文士宗之而介與黃佐德哲  
并稱五先生與吳下四傑同蜚聲寓內云

李德字仲脩番禺人蚤負逸才通三經三緯之學洪  
武庚戌以明尚書薦至京師授洛陽縣典史繼遷濟  
南西安二郡幕非其好也政暇遍覽帝王遺墟登高  
作賦發其胸中磊落之氣人爭傳誦嘗著論謂西安  
南陽皆天下大形勝所在建不拔之基者當擇而取

之江東非其匹也士林聽其識歷職郡邑十餘年年  
薄暮矣乃自陳不能吏願就教官得為湖廣漢陽教  
諭當兵革初靜黌舍驛蓬藿中生徒僅十數輩皆野  
獷不可與語德盡心訓迪之秩滿改任廣西義寧縣  
學其俗尤陋德立法凡遇家有吉凶事當告假者隨  
貧富以楮幣賙之孜孜勸諭使約束鄉黨不得為惡  
習俗日美科貢漸盛當道方薦達之而德以倦遊南  
歸卒于家德為詩多效長吉太白孫黃笑之曰子真  
混元皇帝遠孫也德乃力追古作評者以為跨晉唐

而樂宋元云少嘗自號采真子著論如子書晚更潛  
心伊洛嘗謂誠意為古聖哲心要故其詩有曰意誠  
諸妄遣可以通天地又云鑿空非自然立異豈真實  
堯舜與塗人其初本同一故世稱有理學者必曰李  
長史

黎貞字彥晦新會人性坦蕩不羈五羊孫贊才美絕  
人為文章操筆立就死生榮辱得失一不以介意貞  
從之游故學有成就非一時流輩所及發而為詩文  
滔滔自胸中寫出無斧鑿痕議論古今治亂興廢與  
世道得失洪武初補郡庠生部使者以其有學行署  
為新會縣學訓導志不樂仕乃退築釣魚臺自擬嚴  
光後以事為訟者所誣發戍遼東者十八年艱危困  
阨之中學愈博而識趣愈高氣愈充而議論愈出比  
晚伍歸聲聞益著學者從之遠近畢至貞諄諄善誘  
每俯而就之然以酒自放號陶陶生嘗自贊其像曰  
江湖勝覽渤海浪遊飄飄一葉浩蕩沉浮惟酒是務  
陶陶忘憂譬如力穡乃亦有秋不知老之將至樂天  
知命死即休年五十九卒初貞在遼時孫贊以事死

真抱持其尸以衣裹之殯殮如禮奉柩葬于安山之  
陽典衣營其事為文祭之讀者莫不墮淚其篤於友  
義如此比其自遼歸也適已薄暮明月滿空呼舟中  
餘酒登所築釣魚臺吟嘯乃扣門還家其胸次脫落  
類此陳白沙嘗稱慕之學者稱林坡先生

周尚文香山人初遊邑庠以穎俊選入郡學時翰林  
侍制黃哲解官家食尚文從遊讀書番山清苦該博  
哲稱重之洪武甲子領解額第一乙丑登進士明年  
筮仕丞龍巖涖任公勤廉潔嘗修城西虎渡橋二十

間及爐戶有鐵課申上司准折鈔免納鐵遠軍之於  
召為御史未行坐事謫戍馴象衛時同年狀元丁顯  
同戍相與倡和超然自得其詩文皆妙悟有法以韓  
柳李杜為宗一時才子也其孫慈堅讀書儒雅有祖  
風致社中士子多師之在餘七十嘗為鄉飲大賓云  
鄧林字士齊新會人能為古文章洪武丙子以明經  
中鄉選歷貴縣南昌教諭遷吏部驗封稽勲二司主  
事晚坐事謫居杭州學士大夫多從之遊林嘗自謂  
其學詩於陶韋李杜學文於史漢韓柳學書於晉唐

諸名家初無所知名作懷春賦以寄意曰方春陽之  
和煦兮萬物育而熙熙何使予之不樂兮獨惆悵而  
歔歔思抑鬱其若緘兮言可結而詒詒悶深閨而昏  
嘿兮焉知予之所懷女生而願有家兮及嫵婉於良  
時時與頤而而睽兮豈予德之有虧以保傳之愛助  
兮幸無非而無儀辨貞慎以為肇兮節禮義以為基  
陳女圖以為鏡兮鑑在彼之妍媸不外炫其姣服兮  
矧自揚其娥眉吾有此姱節兮諒君子之攸宜申予  
好以玄纁兮亦既差轂而語縞指初昏以為期兮明

中且而改違德無虧而見澤兮俛懷顧而靜思豈專  
言之不固兮致兩美之參差將其志有締繡兮非蹇  
脩所能媒感標梅之在筐兮欲自往而謂之念伐柯  
之匪斧兮思相鼠之貽譏不由禮而汲汲兮固非予  
之所知時忽忽其不淹兮亦恐繁華之不滋心昧昧  
而莫喻兮假筵筭以決疑靈氛告予以吉兮曰貞固  
之可持雖佳期之非真兮就求美而釋茲節余情而  
不傷兮聊撫景而娛娛步逍遙而容與兮玩衆芳於  
畹畦崇蘭汎乎光風兮竟芳菲而襲衣顧申椒與若

蕙兮謂結車與江籬筌好脩而有取兮終必克夫佩  
常曼余目於遠道兮望軒車之載馳與芳菲之未歇  
兮及公子以同歸亂曰有美一人清揚姱兮繾繾嬋  
娟惟靈脩之故兮芳春永懷無使歎夫遲暮兮後官  
于朝大學士楊士竒祭酒李時勉閱其詩文曰嶺南  
一代文人也自號退庵所著有退庵集  
林士猷揭陽人以儒士舉任本學教諭陞本府教授  
學問該博尤善吟詠名動京師學士宋濂有云潮去  
京師八千里林君不出州里而予知其名其所造不  
既深乎其為名公所稱如此

鄭毅字德弘洪武庚戌鄉貢進士歷官監察御史一  
時風裁凜然嘗按八閩以清直稱才思敏贍世言能  
詩者必曰鄭御史

歐觀生香山人倜儻不羈博學工文詩尤豪邁洪武  
丙子鄉貢進士教授紹興以性傲忤當道左遷什方  
典史歸年六十卒號梅軒有集今不傳  
何子海字百川番禺人梁臨同年也本宋進士起隆  
之後博學能詩嘗擬秋風三疊清婉沉蔚評者以為

過居實遠甚歷丞睢寧永康二縣政敷令行士民稱  
賢

董珣字伯琪番禺人博極群書有飄然物外之趣與  
其二子皆能詩伯曰屢字宗志永樂甲午鄉薦金谿  
訓導仲曰匡字宗輔丁酉鄉薦萬載教訓陞貴州道  
監察御史時稱二董

梁敏字以訥高要人父至孫有善行仕元為新州同  
知敏穎悟能文性孝友年十九舉洪武壬子鄉薦歷  
洧遠教諭敏系昌宛平丞以文學薦擢左春坊左贊

日隆眷遇常被命作午門觀燈詩及賦朝陽鳴鳳  
圖操筆立就成祖稱賞不已尋以乞休忤旨謫  
遼陽死牧再陳再謫枝江訓導疏屢上帝始賜允  
復其官致仕歸中年喪偶不再娶自奉如寒儒以勤  
儉訓諸子暇日多所著詠年九十有六卒有雲萍集  
吳宗直遂溪人獵涉經史善於筆札尤工于詩洪武  
己卯領應天府鄉薦以文藝知名于時累官禮部儀  
制郎中有集今不存

林文亨海康人永樂初鄉試第一登甲申進士第歷

粵大記 卷之十四  
官戶部員外郎性情淳謹無貴勢氣習鄉評重之工  
詩文不苟作獨同年同邑林現者為興化縣丞恬退  
不求利達文亨為賦還鄉詩蓋重其人也

王克義瓊山海口人永樂丙戌進士授崇仁知縣大  
臣薦其才有博學宏辭等語至則增減宋詞科出題  
試之果中式陞都官尋出為建昌推官所至廉能克  
義試蓬萊春曉歌碧雲初散扶桑樹六龍已駕羲和  
馭海上神山曉色分琪花瑤草濕香霧雙雙彩鳳棲  
梧桐嗷嗷相應朝陽東四海蒼生盡蘇息萬國如任

春風中憶得當年來上國棘園鏖戟文場屋瓊林宴  
罷醉扶歸不讓當時步瀛客厥來出宰十八年于今捧  
詔還朝天上林春色正明媚百花燦爛爭芳妍自喜  
生逢堯舜世愧乏涓埃酬 聖帝吟詠非才丹淚垂  
強作狂歌歌舜治

郭張善潮陽人少孤力學善經義文詞永樂丁酉六  
月以儒士舉自陳幼孤賴繼母陳氏撫教而成願出  
仕報效 上令翰林院試其文可取授翰林院檢討  
考滿稱職復任時奇其際遇云

陳衡字祖平陽江人舉永樂丁酉鄉試補上舍生授  
戶部山東司主事調工部以汰冗官記名于家未幾  
擢取復職督徐州百步洪廉謹著聲喜吟詠嘗作潭  
底月詩百餘首以見志其警句云光彩也應無地著  
清操惟幸有天知又云妖蠶浸魄秋容老神蚌呈珠  
夜色回又云江空隻影惟留恨半夜孤燈自落潮至  
今為人所膾炙

何潛淵字時曜東莞人質性明睿有操守好學問為  
詩文必欲理勝於詞立心行已壹循矩度蚤從羊城  
陳仲壁講性理學旅館夜分忽有窺垣而至者遽斥  
使退朋儕重之洪熙初知縣李貞舉經明行脩薦于  
藩司以親老辭歸親疾侍湯藥惟謹居喪毀瘠三年  
不近葷酒事兄潛深友愛彌篤頌白猶同財共居因  
名其堂曰同心晚年與邑耆英結詩社于鳳臺潛淵  
及羅泰社中宗之成化初知縣吳中每舉鄉飲必躬  
請為正賓歲時式問致恭稱為止齋先生年八十五  
卒同鄉長史黃結嘗曰維止齋行可媿古之君子才  
不愧今之名賢云



涂瑞字邦祥番禺人通判疇之子少穎悟不凡儀表  
豐偉弱冠蔚有文名每督學試輒居首性慷慨有大  
度不屑齷齪常態一時名公咸器重之成化丁酉鄉  
試第一丁未進士第三人及第授翰林院編脩日披  
石渠金匱之藏問學日益進而文日益有聲同署者  
皆謙讓虛左席庚戌以脩 憲廟實錄成陞脩撰與  
經筵進講多引 君於當道其才學書法儀表為一  
時冠稱翰林三妙癸丑例請歸省時父母皆無恙日  
稱觴膝下陶陶然盡天性之懽士林榮之未幾卒

咸惜其未究于用瑞為文汪洋浩滴成一家言廣入  
國朝及第者瑞實開先云第瑾並有才名同榜進士  
時稱二涂洵一門科名之盛也  
康麟字文瑞號介軒順德龍江人景泰甲戌進士授  
監察御史巡按八閩貞肅百度發奸摘伏如神駟馬  
所至伸寃理枉崇正糾邪一時想望風采稱真御史  
性善吟咏究心推敲巡歷之暇博採百家選唐諸詩  
照韻分類依揚謙高棟等所選唐音取五七言律絕  
分始音正音遺響而足之以青蓮工部昌黎三大家

以一東二冬等三十韻類而成書名曰雅音會編凡  
十有二卷總詩三千八百餘首其間四鍊五法七德  
六義傍犯假對雙聲疊韻與夫正法偏格句法句眼  
之類一覽而備誠詩學之關鍵也所著有世教錄  
倫文叙字伯疇別號迂岡南海人長身玉立頭顱大  
二尺許幼秀穎有術者見之曰此兒必魁天下弘治  
己酉以儒士就試御史周南大異之入棘果中高等  
肄業太學會試殿試皆第一授翰林院脩撰學行才  
器為世所推重為文根極理致而詞藻溢發同館皆  
遜謂弗及乙丑武宗登極頒朔安南克正使會丁  
外艱歸不果行庚午起補原職克經筵講官每遇  
講期必凝神精思務發明理奧以啓君心而儀度  
顛昂音吐洪亮上注目焉尋陞右春坊右諭德兼  
翰林侍講壬申九月進講舜有臣五人而天下治多  
規諷語上和顏傾聽癸酉春與脩玉牒考覈惟詳  
是秋命主應天試所得多名士比還得疾卒于京  
師年四十有七公天性溫醇德器粹望之可知其  
為君子居嘗以書史自娛手不釋卷為文宗韓楊脩

長宛轉蔚有真趣其孝友出于天性而與物無競豁  
有雅量尤善教子長以諒鄉試第一辛巳進士讀中  
秘書歷官南京通政叅議次以訓會試第一殿試第  
二歷官南國子祭酒次以誥登進士高等雅有雋才  
父子三元海內科名之盛未有出其右者惜公與白  
山皆不及知命之年麟角而折鳳毛而摧詎非氣運  
使然與

黃佐字才伯號泰泉一號太霞子祖瑜號雙槐為長  
樂令父畿邃於理學稱為粵洲先生弘治庚戌生公  
是夕雙槐夢有紫綬金章者入室喜謂必亢歎宗幼  
穎悟五歲觀周程六君子遺像自誓必如此而後為  
人十二歲舉業成弱冠舉庚午鄉試第一作九州問  
以見志潜心理奧至忘寢食嘆曰孔門之學知行並  
進豈可偏廢乎庚辰中會試十六名逾年廷試初擬  
進呈移寘二甲十一名選庶吉士第一以乾清宮題  
試諸吉士公獨先成諸老竒其文謂張平子王文秀之  
流也授翰林院編脩時嘉靖初元公上初政要疏及  
脩舉新政疏刑書林公大韙其議遂與定交會試充

粵大計 卷之四  
考試官值議大禮公與尚書毛澄同疏有謂公為黨  
者會冊封渭南王克岷府副使事竣堅辭金幣歸家  
陳情養母不允力疾還朝三年滿考贈粵洲如其官  
上省親疏力懇得允春出潞河與文公徵明聯舟唱  
酬甚適至杭訪王陽明論良知之學抵家上疏養病  
有司請修廣州志書成却幣辭宴戊子大禮成有謬  
公者出為江西按察僉事上疏乞養親隨補廣西僉  
事提督學校抵蒼梧謁軍門秉禮不跪撫臣啣之經  
府江徭賊出沒諭以恩信皆叩首去抵省城則脩書  
院育人材日與諸生講明理一分殊之旨因輯理學  
本源以端士習又撤淫祠行射禮舉節孝立鄉社擇  
士民及徭獯之子弟者教之風化大行校士懷集偶  
得家報母疾即日疏丐致仕棄官竟歸撫臣以前憾  
偕御史劾公擅離職守朝議止着致仕既歸卜築粵  
洲草堂遠近學者從之遊時多宗象山之學謂朱子  
為支離者公固折衷之曰朱子有萬世之定論亦有  
一時間答之言又作格物說以明本指都御史陶公  
諧薦公有文章華國謀猷經邦之語禮部侍郎呂柟

以宮僚薦丙申駕幸平臺上謂相臣曰向李時曾  
薦黃佐可用皆叩首曰佐才實可用遂以翰林脩撰  
左春坊起公于家至京作六經政要箴又更正訓蒙  
三字經欵上之輔臣不悅書不果上而止充經筵  
講官遇事規諷陞翰林侍讀掌南京院事便道歸省  
奉母宜人以行陞右諭德兼脩撰同脩玉牒陞南  
京國子祭酒頒五倫條約禁止超撥之法作南雖志  
人作樂典龍湖張治見之曰蕭韶九成可復聞也主  
試南都因以策士丁母憂歸廬于墓側起復陞少詹

事兼翰林侍讀學士入京見輔臣抗禮惟再拜談及  
河套事夏言不悅會吏部右侍郎缺欲以公及王公  
用賓推補先是崔公桐與許公成名互爭言官劾之  
併及王公謂公亦有覬覦奉旨致仕公不辨抵家  
諸生復從講學日錄所聞名曰庸言蓋篤信孔孟而  
學貴力行晚歲謝病少通賓客公仕籍三十年立朝  
僅數載雖屏居有廟廊之憂嘗作鄉禮寓保甲之法  
鄉邦賴之丙寅七月疾革猶作詩有氣完光岳身在

雲霄及貽謀無厚業忠孝種心田之語歛襟拊帶曰  
弘毅當如是也年七十有七子在中在素在宏在素  
舉乙卯鄉試八問學該博與廖洞野齊名所著文集  
六十卷樂典三十六卷庸言十三卷革除遺事十六  
卷翰林志二十卷廣東通志七十卷廣西志六十卷  
南雖志二十四卷詩經通解春秋傳意明音類選各  
若干卷傳于世學者稱泰泉先生

倫以訓字彥式別號白山狀元文叙之次子少有異  
質書過目不忘稍長通六經子史百家言正德庚午

鄉試第六人時年十五是年丁父狀元公憂丁丑中  
省試第一人殿試第二人授翰林院編脩予告畢姻  
遂侍母者七年癸未兄御史以諒亦告歸養公復出  
供職乙酉纂修武廟實錄成晉脩撰賜白金文  
綺已丑壬辰同典會試校閱精確所得多名士充  
經筵講官儀度端雅上為起敬甲午以九歲考績  
晉右春坊右諭德偕龍湖張公主試南畿所得尤多  
名士丙申陞南京國子監祭酒敦典明彛脩德講學  
毅然以斯道為己任士習一時丕變丁酉奉恩贈

諭德公如其官封太宜人為太恭人迎養于南監宦  
邸者二年一日太恭人有歸志即上疏得請奉板輿  
還粵時人榮之公性夙敦孝友與通政互相砥礪教  
諸弟尤懇至平生儉約雅淡不植黨不樹私不苟取  
予尤熟 朝廷典章有問者條答無遺其發為文詞  
意暢神適非人所能及若壬辰會試文質一策究竟  
古今循環之迹而變通以道 皇上大加獎異後建  
崇質殿取其意云所著文集四十八卷詩集三十二  
卷 國朝彙憲二百卷時稱著述之工庚子執太人

人之喪過哀而卒年僅四十有八其力方強其化亦  
熟其澤未及施於天下論者謂公有丘文莊之博而  
不為僻有梁文康之學而不為同有霍文敏之剛而  
不為竣而惜天不假之年未見其止也

倫以誥字彥群別號穗石南海人狀元文叙季子也  
年十七舉己卯鄉試廷對擬鼎甲為忌者抑寘二甲  
授禮部儀制司主事凡表箋封拜旌賢校士一切大  
典極其敬慎考最轉兵部武選司郎中公性至孝例  
請歸養遂不復出或諷之則曰隱居以求其志吾蓋

遵孔子法也從甘泉先生遊宗白沙先生主靜之學  
嘗謂陽明先生講學即以志道篤趨向正稱之嘗語  
學者云道不在談論得之力行文不在藻麗準之六  
經故其言動婉有法程其文章可追大雅平生杜跡  
公庭每遇 聖節必儼然從當仕者后甲子之變四  
郊士女趨城不得入公叩直指公啓城活生靈奚啻  
百萬至今德之公為文下筆數千言立就賦詩或一  
韻百餘首宏博不凡壽八十卒所著文集五十六卷  
詩集四十三卷藏于家笥

陳建字廷肇號清瀾太守恩季子也與兄越超赴皆  
領鄉薦而建爲春秋魁究心國家因革治亂之迹及  
道術邪正之機兩上春官皆乙榜以母老選授侯官  
教諭日勤錫鑄貧生如表栖梧等分俸周之與巡按  
潼川白公賁論李西涯樂府因著擬古樂府通考與  
督學潘公潢論朱陸同異作朱陸編年考督學江公  
以達命校十三經註疏成代作上十三經註疏奏稿  
遷臨江府學教授編周子全書程子遺書大有造於  
來學聘典試者几四江右廣右雲南湖南所得多名



士而滇士嚴清後爲名冢宰時論多之尋陞山東陽  
信令未幾以母老力告歸養時年方四十八歲益銳  
意于著述哀輯

聖祖啟運以來迄于正德爲皇明通紀凡三十四卷  
又著治安要議六卷其言切于通變揅弊又訂正朱  
陸異同爲學部通辨以端學術復著古今至鑒六卷  
以嚴勸戒刻陳氏文獻錄以示子姓莆田林公潤爲  
都御史脩輯宗藩條例內翰李公廷機編百子粹言  
則多採公之說也公學識溫醇議論純正酌古準今

崇正黜邪則毅然責育莫奪年七十有一而卒林尚  
書潤稱公涵泳古今覈治亂之變通性道之源譚尚  
書大初亦稱其經世之遠憂世之深予家粵白大夫  
與公同典雲南癸卯鄉試相得甚驩稱公博古之學  
用世之才云

林大欽字敬夫別號東莆海陽人生而穎敏幼嗜學  
家貧無書過肆見眉山蘇氏集心竊慕之佇玩移日  
竟成誦後爲文絕似之縉紳長老咸器重焉嘉靖辛  
卯以儒士應試對李綱十事其詞直其事核督學王

公與巡按吳御史歎異之曰此必大魁天下是年中鄉試第六連中進士廷試狀元及第公廷對不起冒語一如漢策殿閣大臣以不合式而有奇氣置進呈十二卷之末上覽大異之列第一比制下海內翕然稱復有蘇子授翰林院脩撰每有著述一時爭傳誦之尋以母老疏乞歸養築室東甬山中以聚族人族里待之舉火者數百指吉水羅念菴武進唐荆川時遣書問學公自負奇氣厭繩趨尺步而好為豪舉寄意於詩酒臺榭聲色之樂客至莫見其面後母氏卒公哀毀踰禮既葬歸竟病卒嗟公以瓌奇之質乃輒豪佚自廢才難不信然哉

李時行字少偕南海人嘗讀書於羅浮青霞谷因號青霞弱冠入邑庠為督學豫陽田汝成所鑒賞庚子舉于鄉辛丑連登進士第授浙江嘉興縣知縣鉅豪桀驚悉治以法有訟其兄析產不均者驗其券更授之各俛首服部使者交章薦于朝陞南車駕司主事為媚者所構遂拂衣歸杜門讀書從湛甘泉黃泰泉二先生遊築小雲林於西郊扁曰青霞洞天嘗遊

吳中與諸名士結方外之交有騰鶩九州之氣其文章法漢魏古詩法顏謝歌行法李杜律絕取裁於沈宋王孟咸超詣入品所著駕部集雲巢子天求子癯瘠子傳于時讀之者可想見其人云

梁有譽字公實別號蘭汀南海人父世驃以進士為御史轉福建按察僉事茂著風裁有譽兒時秀穎日誦數千言長益沉思百氏講業于泰泉黃先生砥礪行誼癸卯舉于鄉庚戌登進士第授部主事聿勤夙夜審視桎梏貴臣有以讒論死下獄者輒悲憐之在

自少陷虜中及長奔歸偵者得之以為間諜訊得其情釋之決獄務平及時稱長者居曹多暇博綜緗素多所撰著力追古作者時同舍郎李攀龍徐中行王世貞宗考功臣吳舍人國倫謝山人榛結社唱和都人目為七才子居三年蕭然一室袁州當國建安為冢罕聞其才欽羅致門下謝不往尋引病歸鏹來家園教二弟有兆有禎誥誥競爽構拙清樓以居作詠懷十五詩社中人自謂弗及尋乃浩然遊羅浮未至而返一疾竟卒年僅三十有六所著此部集六卷行

于世子逢登清標邃養為詩文有矩矱而翩翩秀發  
稱其家兒云

黎民表字惟敬自號瑤石山人籍從化父貫翰林吉  
士授監察御史以直言落職 穆宗登極贈尚寶少  
卿母恭人梁氏誕公之夕夢有持羽幡數十人從雲  
中擁一童子入室五色璀璨覺而生公幼穎異九歲  
習舉業十三為邑庠生二十歲舉鄉試榜魁屢試春  
官弗第已未就銓天官授翰林院孔目辛酉陞吏部  
司務辦內閣 制勅房事乙丑陞南京兵部職方員

外時兵缺糧欲作變公示諭諄切中止之丁恭人憂  
起補戶部浙江司員外監通州倉轉餉雲中事竣仍  
召掌秘閣侍 經筵預脩 世宗實錄成晉郎中加  
四品俸脩 玉牒又脩 穆宗實錄成陞河南布政  
司右叅議萬曆己卯乞致仕歸好讀書博綜古典下  
及百家禪史過目成誦至其豪邁之氣閱放之才則  
獨立一時雄視千古其操尚廉介不為脂韋不事苞  
苴有故人交極厚未署南海篆事客持千金賄公為  
解紛公正色斥之至於親知喪葬則捐貲賻助惟恐

後少師事宮詹黃公泰泉獨見雅重諸所論撰必與  
公商確多交海內名士吳門文待詔徵明王侍郎世  
貞歷下李觀察攀龍天目徐方伯中行武昌吳參知  
國倫同邑梁比部有譽並駕齊名上埒盛唐遺響所  
著瑤石山人稿梅花社稿北遊稿若干卷行于世公  
歷仕三朝累膺金綺之賜恩遇特隆而抽簪太  
驟未究其用時論惜之弟民衷進士銓部郎中陞廣  
西參政死節民衷為貢士志操高潔工詩有時名子  
邦琰進士銓部郎中陞江西參政

歐大任字楨伯別號崙山順德人父贈奉政大夫南  
京工部郎中士元家多藏書公幼耽誦覽無所不窺  
十四歲授春秋為邑弟子員督學林端簡公雲同試  
居首時與黎惟敬民表梁公實有譽從黃文裕公佐  
學衆擬必舉春秋第一人乃八應舉弗錄就廷試  
選江都訓導歷光州學正邵武教授栖遲十年始入  
為國子助教六館之士爭執經問難上方幸學獻  
臨雖頌賜衣一襲尋改大理寺左評事公謂刑獄至  
重一成而不可變凡論白必盡心焉黃太監姪殺人

司寇欲以小失者抵罪卒駁正之一日奉許戚畹封  
事入奏中貴人自內出却之公大呼曰御前封事誰  
敢阻却竟上之俄遷南京屯田主事殫力稽察積弊  
稍除轉虞衡郎中庶務具舉督修孝陵有白金文  
綺之賜甲申丐致仕歸天性孝友修始祖祠為家祏  
以祀奉政公時多其孝公學博而才贍所撰詠力追  
漢魏與李于麟王元美汪伯玉徐子與吳明卿號稱才子晚與  
曾以三輩尤友善年八十卒所著有百越先賢傳廣陵十  
先生傳思玄旅燕浮淮雍館秣陵蘧園等集傳于世

何翼字子時昌之子鰲之弟也弱冠以文名督學莊  
渠魏公器重之以禮經魁鄉試己丑復魁南省授兵  
部武庫主事督教武學時有勢家擅入武學察其冒  
藉黜之於是各勲肖歛戢莫敢儻蕩編修揚名者同  
年相厚以言事謫欵上疏申救之不果尋移疾歸養  
杜門掃軌當路造其廬咨詢民瘼靡不悉其肯綮邑  
人陰受其福而不知其自也尤好急人之難鄉紳別  
駕沈文淵貧不能葬邑博士滕鳳客死廣州不能歸  
皆白於當路資遣之家居問學益邃嘗立祖祠以睦

族出義穀以恤隣里人多稱之撫按先後九薦不起  
年六十卒所著禮經劄意藏于家

馬拯字壯與別號雙村南海人少穎悟於經史過目  
成誦年十三入郡庠督學田公汝成試居首等巡按  
余公本會考第一竒其文遂中丁酉科解元戊戌連  
登進士與盧夢陽齊名時稱盧馬公年方弱冠請告  
歸娶赴選授工部主事介直自持不徇內監囑托未  
數月卒于任人咸惜其才未竟其用然公才名自足  
不朽何問年哉

劉克正字懋一號海樵從化人父嶺陽公格博學好  
脩嘉靖庚子舉于鄉令六合繼移信豐皆有遺愛民  
生祠尸祝之公其冢子也生而穎悟年十七入邑庠  
每試輒冠多士隆慶丁卯魁鄉薦辛未會試主司竒  
其文擬魁天下偶置第六名時論惜之既第進士改  
庶吉士試居高等逾二年授翰林院檢討侍 經筵會  
皇上登極覃恩得進階封父承德郎奉 命冊封靖  
江王王郡王也欲比親王例受朝見公曰 祖訓不  
可違也王不能屈禮竣餽遺一無所受朝議韙之時

修 兩朝實錄充纂修官錄成 賜白金文綺嶺陽  
公卒奔喪南歸哀毀骨立冒暑經營墓地形神日耗  
比起復不欲離親墓以限逼勉強而行抵維揚疾作  
入淮具疏以 請還次真州而卒年僅三十有七性  
孝友事親承顏順志待諸弟曲盡友于諸弟恂恂迪  
訓克修舉于鄉克治輩咸勤緇素駸駸進未艾也公  
質敏而才茂肆力詞賦為丁后溪諸南明群公所推  
重儼然稱翰苑宗工矣惜早卒何古林先生表其墓  
而深悲之公無子以弟克修子翺翩翩殊有鳳毛云

羅一道字貫鄉號中山博綜子史而質任自然中已  
酉鄉試庚戌登進士第大學士徐階讀其對策竒之  
但以中有讜語如云君德莫大於敬天而禱賽非敬  
天之實也君道莫先於勤民而祈求非勤民之實也  
讀卷官嫉其語太直抑寘二甲乃聲華彪傳海內矣  
授刑部主事壬戌會試分考得張廷臣佺立陳洙彭  
富皆海內名士歷官湖廣叅政分守湖北不阿權要  
罷歸杜門養重不干謁有司卒于家所著中山存稿  
藏于家笥



潘光統字少承號滋蘭順德人魁岬磊落少補邑弟子員應詔輸粟為太學生見知于司成季泉孫公司業大洲趙公而大學士李公敬重之未幾以母老告歸養投贈言者多比之何蕃云既歸從黃泰泉先生於粵洲究心子史兼工詩學請于泰泉類選明音唐音若干卷而自捐貲剞劂之泰泉為序以傳辛未選光祿良醞署監事堂鄉路坦齋奇之薦升大官丞歲羨萬餘中貴人侵沒為奸光統毫不染指群邪歛手銓部廉其賢欲優遷之尋以病卒發其篋無餘積值其子豫之寄百金至乃得成殮時稱其廉光統天性孝友為其父樹家廟為其母築樓居烏革翬飛甲于海上鄉黨鄰里有乏則樂周之雅好圖史作怡馨堂飛雲閣為藏書之府所著史漢存疑山房紀聞及詩文各若干卷存于家笥子豫之博而雅益之敏而雋皆能詩仗義有父風云

外史氏棊曰夫摹象二儀繪綴萬彙則莫尚乎詞華第握靈蛇之珠者不混於魚目龔翡翠之羽者增華於鳳藻詞之蔚為國珍豈不譁譁乎

哉吾粵詞人漢無可攷唐則盧宗回李文儒邵  
謁楊環黃隱居擷其英慈塔一咏南濱三隱今  
猶膾炙于文苑也五代則孟賓于陳拙鄧恂美  
張詢黃匪躬周克明揚其瀾金鰲遺集黃鍾正  
音向嘗焜煌於執圃也宋藍奎富文章時稱藍  
夫子黃洞博經史見知蘇東坡李南仲之賦羅  
浮陳少微之咏梅花趙東山之題海月蔡齊基  
之得四大法門曾曜鱗之薦秘書黃景賢之賜  
宮錦蔚為一時詞人之冠而徐信陳仲黼譚惟

寅梁弼直唐文嚴蔣科皆琅琅有聲夫孰非出  
川靄秀所鍾哉入我

皇明道化醇苞人文宣朗時則有孫蕡黃哲王佐趙  
介李德結社南園拔華振藻時稱五先生與吳  
下四傑並蜚聲寓內或賦懷靈荃或賡歌黃馬  
或和鍾山雨詩均為 當宁鑒賞輝輝乎

一代之黼藻也黎貞之著林坡集鄧林之賦懷春  
何子海之擬秋風三疊康麟之編雅音黃佐之  
賦兩京梁有譽黎民表之並稱七才子而翰苑

宗上則佐為白眉矣徐瑞首掇探花倫文叙連  
登會狀倫以訓名標榜眼林大欽特選榜元周  
尚文林文亨馬拯發解蜚譽而海内科名則倫  
氏樹赤幟矣至若林士猷見重於宋濂郭張善  
騰譽於翰苑陳衡之咏潭月梁敏之集雲萍鄭  
御史之能詩歐觀生之博古伯琪之聯稱二董  
宗直之名擅一時王克義之蓬萊春曉篇李時  
行之雲巢天求集劉克正之詞賦詎非嶺海炳靈世  
載其英與次而傳之俾後彥有所稽云

粵人記卷之二十五

嶺南郭棊篤周甫編

獻徵類

巖泉隱德

晉姚成甫	齊盧度	張	馬	梁廖冲
隋程 紋	唐李謹微	張	鴻	
宋李士廉	林 脩	劉	富	黎子雲
吳復古	王 霄	吳國鑑	林	橐
田知白	張	真	周伯玉	

明趙晦 李真佑 李宗仁 黃受益

羅子房 鄺昂 李孔脩 王夢吉

鄧階 馮大樹 張銘

姚成甫番禺人有行誼父喪哀毀州辟不就以父不仕復脩世業家雖貧而性耽山水不為世事所嬰棲遯丘園以服食自娛吳刺史陸胤苦南海水鹹鹵導泉為甘溪後寢湮涸成甫復濬之郡蒙其利晉咸安中採菊於菖蒲澗遇一老父教之服菖蒲曰此安期生所餌可以忘老成甫如其言身遂輕健築室甘溪之上並魚鳥以為侶挹源泉而自潔歲波微辟皆不行郡人高其誼咸愛敬之

盧度字孝章始興人性穎悟明老易知兵法亦有道術少隨張永北侵魏永敗魏人追急阻淮水不得過度心誓曰若得免死從今不復殺生須臾見兩楮流來接之得過然後隱居廬陵西昌三顧山鳥獸隨之夜有鹿觸其壁度曰汝壞我壁鹿應聲去屋前有池養魚皆名呼之次第來取食乃去逆知死年月與親友別永明末以壽終

張岳字彥高封川人少而醇厚為鄉曲所譽舉秀才  
初仕晉興令材明敏有吏幹累遷安昌郡守事齊明  
帝於藩邸轉西中郎帝以宣城王入輔用岳為左將  
軍甚見寵信王即位是為高宗明皇帝建武初以平  
寇功代陳顯達為司空貴極台司謙恭禮士嘗建言  
清理獄訟帝從其言躬自聽覽及蕭湛等獲罪岳見  
帝踈忌骨肉諷諫不從乃求出刺郢州即拜驃騎大  
將軍郢州刺史仍加司空岳遂棄官入長沙溫泉山  
人改號山為司空山蓋因其官故云梁武帝天監初

岳卒于山時著靈爽居喪常有見車騎出入者大  
士張治長沙府志為岳作傳人以岳歿為昇仙亦高  
其行誼也

廖冲字清虛桂陽人博學能文辭於經史無所不通  
飭身脩行鄉閭稱之以儒術知名舉秀才仕梁為本  
郡主簿西曹祭酒時武帝好儒學招徠天下名士冲  
與馬嘗命賦許稱上意嘉賞之湘東王之就國也聞  
冲有詞藻請以為王國常侍上許之王為人內猜忌  
而外浮華喜談老子而莫知其要冲嘗坐講進無欲

自靜之說以諷之凡王所為多所規諫遂日見踈薄  
是時帝既耄荒諸子又皆嚚頑不法冲私謂所親曰  
根本撥矣天下必不能久治吾當去且不去王將以  
赭衣衣我即浩然掛冠歸結廬靜福山在縣北五十  
里居焉時大同三年也託迹黃老以鍊丹服氣為名  
幽棲自適不復知有塵俗事人往訪之見其吟眺水  
石間猛虎脩蛇馴狎其側休休如也遂真以為得道  
矣陳光大二年卒壽九十有七世之好事者相傳冲  
白日上昇號其地為仙翁壇遺址尚存唐刺史蔣防  
經所居為作碑銘刻石山下有捫蘿撥雲瞻仰不  
之嘆且謂冲策名金簡晉身玉堂辭詞林學苑之職  
以紅霞丹府為家鶴骨松貌泉淍谷虛寓形人間天  
地無累蓋扶桑公陶隱居之流也

程收潮州程鄉人為人恂悞無華性嗜讀書不慕榮  
達素以忠信結人人服其行誼有不平者不往訴之  
官輒質成於收收為之辯是非曲直咸心服而退當  
時化之心有愧怍者望其廬輒思改過有陳太丘之  
風焉收生於南齊時歷梁陳而行誼大著於隋至義

寧初乃卒年九十餘後人思其德名其里曰程鄉因以名縣云叟二子長松字伯材事父母最孝終日怡聲未嘗大言疾語隱居不應薦辟次杉字仲材仁壽中以學術被徵隋末為弘農郡守罹父憂葬後值天下大亂遂棄官遯于攸邑之靈谷習靜日久絕有神異常端坐默默如坭塑者一出語輒豫知人禍福鄉氓每值旱澇往拜禱之許諾輒應後壽至百餘歲卒人以其眉壽因指謂羽化稱為真人焉

李謹微德慶人天祐年進士授番禺令之任夜泊三洲時夜半月高作歌吟聲有一漁父拏舟而來長揖謂曰適聞子吟嘯有觀國之志偶就子會世將亂矣宜高尚雲林以保天年言訖不見謹微悟遂隱不仕張鴻連州桂陽人唐天祐末年進士方將筮仕知運祚將易遂隱遁不出天下聞而高之為詩清絕世所傳誦著述甚裕有集十二卷行于時君子曰自唐季迄五代可謂無道之世也已視篡弒為飲食棄彝倫如弁髦豺狼冠纓而鸞鳳伏竄仕其時措湛身不測之淵以自娛也若李謹微張鴻者豈非賢哉

李士廉字舉之四會人形貌魁碩有大志喜周游四方尤愛蜀之勝槩因寓于錦城輕財好施蜀人敬之熙寧二年河隴用兵諸將經費不節朝廷遣御史按察下總管使王君萬於獄君萬素不識士廉望風使人求救士廉知君萬驍將也出已錢二千緡與之免罪既出獄適值鬼章犯洮隴君萬力戰屢克敵每以所獲功為士廉報士廉曰吾豈望報者天果祐吾有子力學使竊獲祿養足矣君萬感泣後子積中果登進士第士廉從積中宰新吳時廉訪委鞠獄陰使中傷人又令增羨鹽許以薦章士廉戒之曰吾固願汝顯榮必以是得之弗願也積中竟從父訓後以積中貴封翰林學士李氏子孫之多賢實士廉積德之報也

林脩南海人輕財好施造淨慧寺千佛塔者其人也元祐初調官京師授鳳翔府寶鷄縣主簿時司馬溫公書儀及居家雜儀未刊行脩手錄以歸守為家法脩之孫曰師仲曰逵曰遠皆好學循禮山谷黃廷堅謫居涪州師仲往謁之山谷勉其教子讀書一帖曰



質夫兒已十七歲正是與擇師友時人家有賓客動輒費數千乃不能捐二百千奉其師友不可謂善計者也後其家慕山谷之言創義齋延賢師以教子弟及諸生隆興初有由此登第者質夫師仲字也遜遠居母喪一遵禮制侍郎胡銓作素冠說以貽之

劉富南海人仕試將作監主簿拂衣歸隱熙寧元年知廣州張田徙郡學于國慶寺之東未及營造而田卒富納貲獻材戮力以自效殿堂廊序次第將完轉運使陳安道以為卑狹而止之繼田任者程師孟將

之奇發官貲庀成之富復以負郭之田總其直與費為錢五十萬資于學懷化將軍辛押陀羅者蕃酋也聞風興起亦捐貲以完齋宇且售田以增之復置別舍以來蕃俗子弟之願學者鬻舍之成廩食之備富之功居多宋末校書郎東莞黎友龍者亦損貲修邑學近弘治間建崖山全節廟大忠祠新會義民趙思仁助錢二百千皆可謂見義勇為者矣

黎子雲儋州人居州東二里昆弟貧而好學城南有別墅所居皆林木水竹清幽瀟灑蘇軾雅敬禮之

每與弟載酒過從請益問竒日相親多作歌有寂寞  
兩黎生食菜真臞儒之句一日軾往訪之遇兩從農  
家借笠看屐道上婦人小兒相隨爭笑邑犬群吠子  
雲兄弟恭敬自將送軾至館未嘗懈也因名其別墅  
曰載酒堂云時有翟逢亨者歸善人事母孝學問博  
洽鄉人呼為翟夫子居白鶴峯東蘇軾居惠時與往  
還又王公輔儋州人世傳天文蘇軾甚重之後 彥  
質亦與相厚公輔年一百三歲而卒

吳復古字子野揭陽人志趣超逸以父為侍講

志失其名

當蔭官遜于庶兄居父母憂廬于墓者三年手植木  
墓傍又以餘力葺治園亭教養子弟後遺去妻子築  
庵居潮陽直浦都麻田山中絕粒不食間出遊四方  
遍交公卿然一無所求每論出世法以長生不死為  
餘事煉氣服藥為土苴待制李師中於世少所屈及  
見復古稱曰白雲在天引領何及蘇軾與其弟轍暨  
一時名士皆傾下之軾嘗問養生復古對以曰安曰  
和及軾南遷見於真陽無一言及得喪休戚事獨曰  
邯鄲之夢猶足以破妄而歸真今子目見其身履之

亦可以少悟矣軾嘗為作遠遊庵銘

王魯字霞舉儋州人嘗事東坡蘇軾筆硯間年餘七十發貢至京住辟雍者三年建炎初歸鄉潛德不仕李光以宿學稱之年至九十六衆推為鄉先生妻吳氏亦年九十餘郡守以聞魯授初品官吳封孺人又有符林者亦儋人蘇軾稱其安貧守靜謂之老符秀才

吳國鑑雷州海康人紹聖中為太廟齋郎後退居于家先是寇準謫雷州人有舍之者為丁謂所害自是無人敢舍遂定為齋輒安置雷州莫謀所止國鑑慕義而不顧害特創一室館之輒與之立儗券章淳果謂其強奪民居下州追治以儗券甚明而止國鑑因是不復仕進世稱其高致

林橐者南海人也以靜脩聞廣帥方大琮初行鄉飲禮請以為大賓橐時年九十四矣威儀可則終席無倦容大琮稱為衛武公之流

田知白番禺人操脩粹白廣帥方大琮脩濂溪書院成訪於文溪李昉英求主席者昉英荅曰是邦老成

人無如田知白者大琮躬詣之知白以病辭再往叩  
之則遁矣知白時年踰八十猶能燈下細書貧甚得  
錢即貫酒飲之自號醉鄉遺老制行甚潔皆一時耆  
舊也

張真號魯庵海陽人潛心性理之學靜處一室玩味  
經旨衣冠儼然端坐終日從游受業者甚衆家居嚴  
肅冠婚喪祭一遵文公家禮潮人多化之元末盜起  
過其里曰此張先生所居不敢犯旁舍亦賴之以安  
周伯玉潮陽人初名瑤元季讀書自娛累辟不起親

故或勸之出伯玉曰吾讀聖賢書肯北面胡虜乎入  
本朝復膺徵命嘆曰吾老矣無適於用辭弗就子三  
人彥敬彥作彥器皆膺薦

趙晦字俊明東莞人系出濮邱元季避地東莞之石  
崗雖在亂離中篤志問學手不釋卷時鄉里自雄者  
召為館賓不屑就洪武五年壬子以明經膺薦任番  
禺縣學教諭藩憲諸公以其學行純懿咸禮重之後  
陞國子監學錄一時門徒居待從有聲者不可殫舉  
如廣東憲使潘伯庸亦其一也寓羊城東垣自號曰

東橋以故學者稱為東橋先生云

李真佑字械之南海江尾人自少力學老而不倦洪武初有司辟為吏避居古岡為人傭人不之知也久之主人翁異其行延為塾師作為文章豐逸弘博求樂間左布政王公亮將薦之會公亮卒遂不果未幾真祐亦卒自號扶搖子所著家式尚存

李宗仁字秉彝英德人性純行脩苦志力學登洪武庚午鄉貢進士旦夕讀書不厭曰吾斯之未能信安可仕邪遂隱居南山終身焉

黃受益字虛已東莞人勸之子世其文學善於詞賦尤長於古文開門授徒擔簦負笈者戶外常滿雅志不喜仕永樂庚子有司強之入試果以春秋中選遂隱居不出年五十五卒諸子皆業儒次子結最知名羅子房字宗傑順德人成化庚子領鄉薦會試後遊大學歸以母老乃築卧愚亭以奉母為樂時白沙陳檢討江浦在行人皆與子房友善為賦卧愚陳白沙詩何處水邊堪此亭偶從詩卷挹芳馨小眠亭上真何意大夢人間肯未醒難以智愚分巧拙儘教描畫

付丹青老夫伏枕廬山下頭白于今未與名定山  
莊杲詩白沙詩在卧愚亭萬古高人萬古馨何處有  
亭長合在人間此夢直該醒酪然白酒三杯盡只麼  
西山數點青春到堯夫真意思無名公本是無名大  
良李孔脩亦與子房為友而尚書吳廷舉治縣時嘗  
咨問民間利病子房棘棘言之有得理于言者請賦  
百金為壽子房大吃曰何得汗我弘治中知永福縣  
民貧瘠又苦盜至則均田薄賦招流亡嚴保甲民乃  
安堵縣有大猾張月麒縱其子殺徐氏二子亡不得

夕有二鳥繞廨哀鳴子房恠之從走卒微行廉得其  
狀捕月麒及其子正法監司重之奏治行為廣西第  
一後以疾乞致仕父老涕泣遮道留之不得歸之日  
囊無十金之貯及卒其子粥廉為喪葬具夫以宗傑  
之才且廉而信不滿其德語曰高樹寡陰獨木不林  
其是之謂與

鄺鼎字器之南海人幼有志每讀書寒暑不輟成化  
乙酉科中式鄉試丙戌中乙榜不屑小就入太學肄  
業每試居優等聲稱藉甚聞于京師時大宗伯白公

學士尹公太常卿李公閩進士五美孫公皆樂與交  
遣其子受易于門卒業國學二十餘年為詩文灑然  
有自得之趣及卒孫五美哭之詩有義易廿年談夜  
兩禹門幾度負春雷之句族有大岑沙祭田一區被  
憲使陳某所占歷訴當道而直之至今族人祀之于  
祠兩廣都御史韓雍為建坊于鄉以旌其賢

李孔脩字子長順德大良人自號抱真子僑居廣州  
之高第街混迹人群張翊識之則薦于其師陳獻章  
獻章坐稱之名由此益著孔脩嘗輸糧于縣縣令異

其容止問姓名不答第拱手令叱之曰何物小民乃  
拱手耶再拱手令怒答之五竟無言而出有庶母父  
沒改適誣孔脩奪其產縣鞠之孔脩操筆置對曰毋  
言是縣疑焉得其情乃大禮敬孔脩由此知名素  
家貧敝廬薄產蔬食不繼未嘗一顰其眉詩字不履  
前人自為戶牖或觀山水歸而圖之見者爭愛而酬  
之金曰子長畫平居管寧帽朱子深衣入夜不違二  
十年不入城闕惟攻周易城中兒童婦女皆稱曰子  
長先生吳廷舉由縣令歷藩臬在粵最久與孔脩為

布衣交兩人高風在塵埃之表粵人常道之此兩人亦相成也孔脩卒無子憲使李中少叅王宗教經紀其喪尚書霍韜葬之西樵山志其墓曰白沙抗節振世之志惟子長張詡謝佑不失或問子長廢人有諸陳庸曰子長誠廢則顏子誠愚庸與子長同師故相信如此萬曆乙未祀于鄉賢祠子長善屬詩有花影船頭落釣蓑之句為白沙先生鑒賞云

王夢吉字兆楨南海人父梅澗公廷舉有至行嘗捐金以濟甲丁操舟以拯溺者為鄉評所重年方壯而

卒夢吉奉母李以居屹屹負巨人志比長業文雋朗有矩度督學試陽山剋諸生遂為諸生所擊不得入籍中乃就試南海每試輒數千人屨角屢不勝遂歸休以素業教其子學曾學韶學羲俾各淬鋒以進而自築亭臺鑿泉壘石雜蒔花果行樂其間甚適也父有所育族人予比長而公割產贍之思以承父之志南海里人困於役度輸可二百金公傾囊代償至於陽山之產有斃而奪之者則以大義爭焉曰祖業而奪於豪民乎非夫也年三十八而卒後十三年學曾



成進士為崇陽令贈公如其官制詞曰居家孝友  
處已謙恭有濟物之仁無絕俗之行蓋實錄也學  
魯尋召為御史遇事敢言以謹諫謫後歷轉光祿  
丞上請建儲疏

天子震怒落職歸直聲動海內皆出公庭訓則公之  
賢可知主无美作公傳稱為奇男子云

鄧階字文高號賓野南海人幼孤業儒蘄然自植奉  
母張氏盡菽水惟母卒執喪哀毀如禮敬事二伯兄  
如父伯兄俱蚤世家政叢集日兢兢綜理不遺餘力

嘗曰古人有不墜青雲志者然獨立難因輟緇素事  
家人生產乃又不苟同流俗撫伯兄子一錢尺帛不  
自私鄉族有急亟周之或忿爭不平者為直之而後  
已子于蕃領嘉靖壬子鄉薦歷河東運司先是以寧  
洋尹贈公文林郎繼以福州貳守再贈公奉政  
大夫如其官人咸稱公為子能孝弟能恭父能教躬  
具有碩德云


馮大樹字希浩別號半江順德人博綜群籍下筆滾  
滾千言弱冠試有司奇擢第一方文襄公以姻戚女

鍾歸馬家貧奉菽水惟孝待兄弟雍睦族黨咸敬服  
之然充工詩亦豪飲酒酣浩歌鬯然於懷人多慕公  
才名事延為師時鄧公于蕃方成童公目為偉器如  
春色別駕朱君會極從化李漸子解元粹中皆門下  
士也與鄒君海嶼何君次泉陳君約吾為金石交竟  
賈志不售而卒時子紹京尚幼公諄諄囑以自植後  
果領萬曆癸酉鄉薦官翁源睢寧以清介聞列于名  
宦不負公志如此

張銘字時侃東莞人淹貫群籍隱里中談道自樂家

此處有過錄廷朴之朋輩遺篋命鶴語以明  
此梅山亭為曰位齊自記有曰相手性也  
於此而也夫學有海原齊先生子仲  
正陽公以清白訓之好書畫  
詩文學而云  
外史大節曰勳爵不事主位  
此在洞府人之氣志  
八





清明之朝士固各有志哉嶺海自来號多遺佚  
 盖羅岫樵山舊饒佳勝雲林蒲澗足以栖遲養  
 性者其澹寂以存心守玄者追仙靈而託迹廖  
 冲姚成甫以紅霞丹府為家趙晦李孔脩以明  
 月清風寄傲張鴻同謹微之志程旼有太丘之  
 風至若黎子雲吳復古王霄林脩非遇東坡山  
 谷二太史世何從知其名哉嗟嗟巖穴珪璋埋  
 鬱無聞何可勝道也予故自所知者表而書之

粵大記卷之二十五

